

欽定遼史

卷七十一之九十四

卷一

卷二

卷三

卷四

卷五

卷六

元 中 書 右 丞 相 總 裁 脫 脫 等 修

列傳第一

后妃

肅祖昭烈皇后蕭氏

懿祖莊敬皇后蕭氏

玄祖簡獻皇后蕭氏

德祖宣簡皇后蕭氏

太祖瀛欽皇后述律氏

太宗靖安皇后蕭氏

世宗懷節皇后蕭氏

世宗妃甄氏

穆宗皇后蕭氏

景宗睿知皇后蕭氏

聖宗仁德皇后蕭氏

聖宗欽哀皇后蕭氏

興宗仁懿皇后蕭氏

興宗貴妃蕭氏

道宗宣懿皇后蕭氏

道宗惠妃蕭氏

天祚皇后蕭氏

天祚德妃蕭氏

天祚文妃蕭氏

天祚元妃蕭氏

書始嬪虞詩興闢雖國史記載往往自家而國以立天下之本然尊卑之分不可易也司馬遷列呂后于紀班固因之而傳元后於外戚之後范曄登后妃于帝紀天子紀年以敘事謂之紀后曷為而紀之自晉史列諸后以首傳隋唐以來莫之能易也遼因突厥稱皇后曰可敦國語謂之臧俚塞尊稱曰壽斡廢蓋以配后土而母之云太祖稱帝尊祖母曰太皇太后母曰皇太后嬪曰皇后等以徽稱加以美號質於隋

唐文於故俗后族唯乙室拔里氏而世任其國事太祖慕漢高皇帝故耶律儼稱劉氏以乙室拔里比蕭相國遂爲蕭氏耶律儼陳大任遼史后妃傳大同小異酌取其當著于篇

蕭祖昭烈皇后蕭氏小字卓真歸蕭祖生四子見皇子表乾統三年追尊昭烈皇后

懿祖莊敬皇后蕭氏小字牙里辛蕭祖嘗過其家曰同姓可結交異姓可結婚知爲蕭氏爲懿祖聘焉生男女七人乾統三年追尊莊敬皇后

玄祖簡獻皇后蕭氏小字月里朶玄祖爲狼德所害后齋居恐不免命四子往依鄰家耶律臺押乃獲安太祖生后以骨相異常懼有陰圖害者鞠之別重熙二十一年追尊簡獻皇后

德祖宣簡皇后蕭氏小字嚴母斤遙輦氏宰相剔刺之女男女大人太祖長子也天曆十一年崩附德陵重熙二十一年追尊宣簡皇后

太祖瀋歆皇后述律氏諱平小字月理朶其先回鶻人糯思生魏靈舍利魏靈生慎思梅里慎思生婆姑梅里婆姑娶与德超王女生后于契丹右大部婆姑名月梳仕遙輦氏爲阿扎割只后簡重果斷有雄略嘗至遼土二河之會有女子乘青牛車倉卒避路忽不見未幾童謠曰青牛媪曾避路蓋諺謂地祇爲青牛媪云太祖卽位羣臣上尊號曰地皇后神冊元年大冊加號應天大明地皇后行兵御衆后嘗與謀太

祖嘗渡磧擊党項黃頭吳泊二室韋乘虛襲之后知勒兵以待奮擊大破之名震諸夷時晉王李存勗欲結援以叔母事后幽州劉守光遣韓延徽求援不拜太祖怒留之使牧馬后曰守節不屈賢者也宜禮用之太祖乃召延徽與語大悅以爲謀主吳主李昇獻猛火油以水沃之愈熾太祖選三萬騎以攻幽州后曰豈有試讐而攻人國者指帳前樹曰無皮可以生乎太祖曰不可后曰幽州之有土有民亦由是耳吾以三千騎掠其四野不過數年困而歸我矣何必爲此萬一不勝爲中國笑吾部落不亦解體乎其平渤海后與有謀太祖崩后稱制攝軍國事及葬欲以身殉親戚百官力諫因斷右腕納于柩太宗卽位尊爲皇太后會同初上尊號曰廣德至仁昭烈崇簡應天太后初太祖嘗謂太宗必興我家后欲令皇太子僖避之太祖册僖爲東丹王太祖崩太宗立東丹王避之唐太后嘗屬意於少子李胡太宗崩世宗卽位于鎮陽太后怒遣李胡以兵逆擊李胡敗太后親率師過于潢河之橫渡賴耶律屋質諫罷兵遷太后于祖州應祿三年崩年七十五祔祖陵諡曰貞烈重熙二十一年更今諡

太宗靖安皇后蕭氏小字溫瀆欽皇后弟室魯之女帝爲大元帥納爲妃生穆宗及卽位立爲皇后性聰慧潔素尤被寵顧雖軍旅田獵必與天顯十年崩諡彰德葬奉陵重熙二十一年更今諡

世宗懷節皇后蕭氏小字撒葛只瀆欽皇后弟阿古只之女帝爲永康王納之生景宗天祿末立爲皇后

明年秋生萌古公主在幕察割作亂弑太后及帝后乘步輦直詣察割請畢收殮明日遇害諡曰孝烈皇后重熙二十一年更今諡

世宗妃甄氏後唐宮人有姿色帝從太宗南征得之寵遇甚厚生靈王只沒及卽位立爲皇后嚴明端重風神閑雅內治有法莫干以私劉知遠郭威稱帝世宗承強盛之資奄奄歲時后與參帷幄密贊大謀不果用察割作亂遇害景宗立葬二后于盤巫閭山建廟陵寢側

穆宗皇后蕭氏父知璠內供奉翰林承旨后有雲氣馥郁久之幼有儀則帝居藩納爲妃及正位中宮性柔婉不能規正無子

景宗睿知皇后蕭氏諱綽小字燕燕北府宰相思溫女早慧思溫嘗觀諸女掃地惟后潔除喜曰此女必能成家帝卽位選爲貴妃尋册爲皇后生聖宗景宗崩尊爲皇太后攝國政后泣曰母寡子弱族屬雄強邊防未靖奈何耶律斜軫韓德讓進曰信任臣等何慮之有於是后與斜軫德讓參決大政委于越休哥以南邊事統和元年上尊號曰承天皇太后二十四年加上尊號曰睿德神略應運啟化承天皇太后二十七年崩諡曰聖神宣獻皇后重熙二十一年更今諡后明達治道聞善必從故羣臣咸竭其忠習知軍政澶淵之役親御戎車指麾三軍賞罰信明將士用命聖宗稱遼盛主后教訓爲多

聖宗仁德皇后蕭氏小字替隨哥睿智皇后弟隗因之女年十二美而才選入掖庭統和十九年冊爲齊天皇后嘗以草筵爲殿式密付有司令造清風天祥八方三殿旣成益寵異所乘車置龍首鷓尾飾以黃金又造九龍輅諸子車以白金爲浮圖各有巧思夏秋從行山谷間花木如繡車服相錯人望之以爲神仙生皇子二皆早卒開泰五年宮人耨斤生興宗后養爲子帝大漸耨斤嘗后曰老物寵亦有旣耶左右扶后出帝崩耨斤自立爲皇太后是爲欽哀皇后護衛馮家奴喜孫等希旨誣告北府宰相蕭泥卜國舅蕭匹敵謀逆詔令鞠治連及后興宗聞之曰皇后侍先帝四十年撫有眇躬當爲太后今不果反罪之可乎欽哀曰此人若在恐爲後患帝曰皇后無子而老雖在無能爲也欽哀不從遷后于上京車駕春蒐欽哀慮帝懷鞠育恩馳遣人加害使至后曰我實無辜天下共知卿待我浴而後就死可乎使者退比反后已崩年五十是日若有見后于木葉山陰者乘青蓋車衛從甚嚴追尊仁德皇后與欽哀並祔慶陵

聖宗欽哀皇后蕭氏小字耨斤瀋欽皇后弟阿古只五世孫黜面狠視母嘗夢金柱擎天諸子欲上不能后後至與僕從皆陞異之久之入宮嘗拂承天太后榻獲金雞吞之膚色光澤勝常太后驚異曰是必有奇子已而生興宗仁德皇后無子取而養之如己出后以興宗侍仁德皇后謹不悅聖宗崩令馮家奴等誣仁德皇后與蕭泥卜蕭匹敵等謀亂從上京害之自立爲皇太后攝政以生辰爲應聖節重熙元年尊

爲仁慈聖善欽孝廣德安靖貞純寬厚崇覺儀天皇太后三年后陰召諸弟議欲立少子重元重元以所謀白帝帝收太后符璽遷于慶州七括宮六年秩帝悔之親馭奉迎侍養益孝謹后常不憚帝崩殊無戚容見崇聖皇后悲泣如禮謂曰汝年尙幼何哀痛如是清寧初尊爲太皇太后崩諡曰欽哀皇后后初攝政追封曾祖爲蘭陵郡王父爲齊國王請弟皆王之雖漢五侯無以過

興宗仁懿皇后蕭氏小字撻里欽哀皇后弟孝穆之長女性寬容姿貌端麗帝卽位入宮生道宗重熙四年立爲皇后二十三年號貞懿慈和文惠孝敬廣愛崇聖皇后道宗卽位尊爲皇太后清寧二年上尊號曰慈懿仁 and 文惠孝敬廣愛宗天皇太后九年秋敦睦宮使耶律良以重元與其子涅魯古反狀密告太后乃言于帝帝疑之太后曰此社稷大事宜早爲計帝始戒嚴及戰太后親督衛士破逆黨太康二年崩諡仁懿皇后仁慈淑謹中外感德凡正旦生辰諸國貢幣悉賜貧瘠嘗夢重元曰臣骨在太子山北不勝寒栗寤卽命屋之慈憫類此

興宗貴妃蕭氏小字三爐駙馬都尉匹里之女選入東宮帝卽位立爲皇后重熙初以罪降貴妃

道宗宣懿皇后蕭氏小字觀音欽哀皇后弟樞密使惠之女姿容冠絕工詩善談論自制歌詞尤善琵琶重熙中帝王燕趙納爲妃清寧初立爲懿德皇后皇太叔重元妻以艷冶自矜后見之戒曰爲貴家婦何

必如此后生太子溶有專房寵好音樂伶官趨惟一得侍左右太康初宮婢單登教坊朱頂鶴誕后與惟一私樞密使耶律乙辛以聞詔乙辛與張孝傑劾狀因而竇之族誅惟一賜后自盡歸其屍於家乾統初追謚宣懿皇后合葬慶陵

道宗惠妃蕭氏小字坦思駙馬都尉霞抹之妹太康二年乙辛譽之選入掖庭立爲皇后居數歲未見皇嗣后妹幹特懶先嫁乙辛子綬也后以宜子言于帝離婚納宮中八年皇孫延禧封梁王降爲惠妃徙乾陵幹特懶還其家頃之其母燕國夫人厭魅藥王伏誅貶妃爲庶人幽于宜州諸弟沒入興聖宮天慶六年召還封太皇太妃後二年奔黑頂山卒葬太子山

天祚皇后蕭氏小字奪里懶宰相繼先五世孫大安三年入宮明年封燕國妃乾統初冊爲皇后性閑淑有儀則兄弟奉先保先等緣后寵柄任女直亂從天祚西狩以疾崩

天祚德妃蕭氏小字師姑北府宰相常哥之女壽隆二年入宮封燕國妃生子撻魯乾統三年改德妃以柴册禮封撻魯爲燕國王加妃號贊翼王薨以哀戚卒

天祚文妃蕭氏小字瑟瑟國舅大父房之女乾統初帝幸耶律撻葛第見而悅之匿宮中數月皇太叔和魯幹勸帝以禮選納三年冬立爲文妃生蜀國公主晉王敖盧幹尤被寵幸以柴册加號承翼善歌詩女

直亂作日見侵迫帝改遊不恤忠臣多被疎斥妃作歌諷諫其詞曰勿嗟塞上兮暗紅塵勿傷多難兮畏
夷人不如塞姦邪之路兮選取賢臣直須臥薪嘗膽兮激壯士之捐身可以朝清漠北兮夕枕燕雲又歌
曰丞相來朝兮劍佩鳴于宮側目兮寂無聲養成外患兮嗟何及禍盡忠臣兮罰不明親戚並居兮藩屏
位私門潛畜兮爪牙兵可憐往代兮秦天子猶向宮中兮望太平天祚見而銜之播遷以來郡縣所失幾
半上頗有倦勤之意諸皇子赦盧幹最賢素有人望元后兄蕭奉先深忌之誣南軍都統余覲謀立晉王
以妃與聞賜死

天祚元妃蕭氏小字貴哥燕國妃之妹年十七册爲元妃性沉靜嘗晝寢近侍盜貂襜妃覺而不言宮掖
稱其寬厚從天神西狩以疾薨

論曰遼以鞍馬爲家后妃往往長於射御軍旅田獵未嘗不從如應天之奮擊室韋承天之御戎瀉淵仁
懿之親破重元古所未有亦其俗也靖安無毀無譽齊天巧思乃奢侈之漸宣懿度曲知音豈致誣囑之
階乎文妃能歌詩諷諫而謂謀私其子非矣若簡憲之艱危保孤懷節之從容就義雖烈丈夫何以過之
欽哀狠桀賊殺嫡后而興宗不能防閑其母惜哉

元 中 書 右 丞 相 總 裁 脫 脫 等 修

列傳第二

宗室

義宗 借 子平王隆先 晉王道隱 章肅皇帝 李胡 子宋王喜隱 順宗 溥

晉王敖盧斡

義宗名倍小字圖欲太祖長子母瀋欽皇后蕭氏幼聰敏好學外寬內摯神冊元年春立為皇太子時太祖問侍臣曰受命之君當事天敬神有大功德者朕欲祀之何先皆以佛對太祖曰佛非中國教倍曰孔子大聖萬世所尊宜先太祖大悅即建孔子廟詔皇太子春秋釋奠嘗從征烏古黨項為先鋒都統及經略燕地太祖西征留倍守京師因陳取渤海計天顯元年從征渤海拔扶餘城上欲括戶口倍諫曰今始得地而料民民必不安若乘破竹之勢徑造忽汗城克之必矣太祖從之倍與大元帥德光為前鋒夜圍忽汗城大譁譎窮感請降尋復叛太祖破之改其國曰東丹名其城曰天福以倍為人皇王主之仍賜天子冠服建元甘露稱制置左右大次四相及百官一用漢法歲貢布十五萬端馬千匹上諭曰此地瀕海非爾久居留汝撫治以見朕愛民之心駕將還倍作歌以獻陸辭太祖曰得汝治東土吾復何憂倍號泣

而出遂如儀坤州未幾諸部多叛大元帥討平之太祖訃至倍卽日奔赴山陵倍知皇太后意欲立德光乃謂公卿曰大元帥功德及人神中外攸屬宜主社稷乃與羣臣請於太后而讓位焉於是大元帥卽皇帝位是爲太宗太宗旣立見疑以東平爲南京徙倍居之盡遷其民又置衛士陰伺動靜倍旣歸國命王繼遠撰建南京碑起書樓于西宮作樂田園詩唐明宗聞之遣人跨海持書密召倍倍因收海上使再至倍謂左右曰我以天下讓主上今反見疑不如適他國以成吳太伯之名立木海上刻詩曰小山壓大山山全無力羞見故鄉人從此投外國攜高美人載書浮海而去唐以天子儀衛迎倍倍坐船殿衆官陪列上壽至汴見明宗明宗以莊宗后夏氏妻之賜姓東丹名之曰慕華改瑞州爲懷化軍拜懷化軍節度使瑞慎等州觀察使復賜姓李名贊華移鎮滑州遙領虔州節度使倍雖在異國常思其親問安之使不絕後明宗養子從珂弑其君自立倍密報太宗曰從珂弑君盍討之及太宗立石敬瑭爲晉主加兵于洛從珂欲自焚召倍與俱倍不從遣壯士李彥紳害之時年三十八有一僧爲收瘞之敬瑭入洛喪服臨哭以王禮權厝後太宗改葬于豎巫閭山諡曰文武元皇王世宗卽位諡讓國皇帝陵曰顯陵統和中更諡文獻重熙二十年增諡文獻欽義皇帝廟號義宗及諡二后曰端順曰柔貞倍初市書至萬卷藏于豎巫閭絕頂之望海堂通陰陽知音律精醫藥砭熯之術工遼漢文章嘗譯陰符經善畫本國人物如射騎獵

雪騎千鹿圖皆入宋秘府然性刻急好殺婢妾微過常加剗灼夏氏懼而求削髮爲尼五子長世宗次婁國稍隆先道隱各有傳

平王隆先字國隱母大氏景宗卽位始封平王未幾兼政事令留守東京薄賦稅省刑獄恤繹寡數薦賢能之士後與統軍耶律室魯同討高麗有功還薨葬醫巫閭山之道隱谷平王爲人聰明博學能詩有闕苑集行于世保寧之季其子陳哥與渤海官屬謀殺其父舉兵作亂上命輶裂于市

晉王道隱字留隱母高氏道隱生于唐人皇王遭李從珂之害時年尙幼洛陽僧匿而養之因名道隱太宗淹唐還京詔賜外羅山地居焉性沉靜有文武才時人稱之景宗卽位封蜀王爲上京留守乾亨元年遷守南京號令嚴肅民獲安業居數年徙封荆王統和初病薨追封晉王

論曰自古新造之國一傳而太子讓豈易得哉遼之義宗可謂盛矣然讓而見疑豈不兆於建元稱制之際乎斯則一時君臣昧於禮制之過也束書浮海寄跡他國思親不忘問安不絕其心甚有足諒者焉觀其始慕秦伯之賢而爲遠適之謀終疾陳恆之惡而有請討之舉志趣之卓蓋已見於早歲先祀孔子之言歟善不令終天道難詰得非性刻嗜殺之所致也雖然終遼之代賢聖繼統皆其子孫至德之報昭然在茲矣

章肅皇帝小字李胡一名洪古字奚隱太祖第三子母淳欽皇后肅氏少勇悍多力而性殘酷小怒輒黷人面或投水火中太祖嘗觀諸子寢李胡縮項臥內曰是必在諸子下又嘗大寒命三子採薪太宗不擇而取最先至人皇王取其乾者束而歸後至李胡取少而棄多既至袖手而立太祖曰長巧而次成少不及矣而母篤愛李胡天顯五年遣狗地代北攻寰州多俘而還遂立爲皇太弟兼天下兵馬大元帥太宗親征常留守京師世宗卽位鎮陽太后怒遣李胡將兵擊之至秦德泉爲安端留哥所敗太后與世宗隔潢河而陣各言舉兵意耶律屋質入諫太后曰主上已立宜許之時李胡在側作色曰我在兀欲安得立屋質曰柰公酷暴失人心何太后顧李胡曰昔我與太祖愛汝異於諸子諺云偏憐之子不保業難得之婦不主家我非不欲立汝汝自不能矣及會議世宗使解劍而言和約既定趨上京會有告李胡與太后謀廢立者徙李胡祖州禁其出入穆宗時其子喜隱謀反辭逮李胡囚之死獄中年五十葬玉峯山西谷統和中追諡欽順皇帝重熙二十一年更諡章肅后曰和敬二子宋王喜隱衛王完

喜隱字完德雄偉善騎射封趙王應歷中謀反事覺上臨問有狀以親釋之未幾復反下獄景宗卽位闕有赦自去其械而朝上怒曰汝罪人何得擅離禁所詔誅守者復寘于獄及改元保寧乃宥之妻以皇后之姊復爵王宋喜隱輕儇無恆小得志卽驕上嘗召不時至怒而鞭之由是憤怨謀亂貶而復召適見上

與劉繼元書辭意卑遜諫曰本朝於漢爲祖誓旨如此恐虧國體帝尋改之授西南面招討使命之河東
索吐蕃戶稍見進用復誘羣小謀叛上命械其手足築圍土囚祖州宋降卒二百餘人欲劫立喜隱以城
堅不得入立其子留禮壽上京留守除室擒之留禮壽伏誅賜喜隱死

論曰李胡殘酷驕盈太祖知其不才而不能教太后不知其惡而溺愛之初以屋質之言定立世宗而復
謀廢立子孫繼以逆誅并及其身可哀也已夫自太祖之世刺萬安端首倡禍亂太祖既不之誅又復用
之固爲有君人之量然惟太祖之才足以駕馭庶乎其可也李胡而下宗王反側無代無之遼之內難與
國始終厥後嗣君雖嚴法以繩之卒不可止烏虜創業垂統之主所以胎厥孫謀者可不審歟

順宗名濬小字耶魯幹道宗長子母宣懿皇后蕭氏幼而能言好學知書道宗嘗曰此子聰慧殆天授歟
六歲封梁王明年從上獵矢連發三中上顧左右曰朕祖宗以來騎射絕人威震天下是兒雖幼不墜其
風後遇十鹿射獲其九帝喜設宴八歲立爲皇太子太康元年兼領北南樞密院事及母后被害太子有
憂色耶律乙辛爲北院樞密使常不自安會護衛蕭忽古謀害乙辛事覺下獄副點檢蕭十三謂乙辛曰
臣民心屬太子公非閔閔一日若立吾輩措身何地迺與同知北院宣徽事蕭特裏特謀搆陷太子陰令
護尉太保耶律查剌誣告都宮使耶律撒剌知院耶律速撒護衛蕭忽古謀廢立詔案無迹不治乙辛復

令牌印取君蕭訛都幹等言查刺前告非妄臣實與謀欲殺耶律乙辛等然後立太子臣若不言恐事發連坐帝信之幽太子于別室以耶律燕哥鞠案太子具陳枉狀曰吾爲儲副尙何所求公當爲我辨之燕哥乃乙辛之黨易其言爲欵伏上大怒廢太子爲庶人將出曰我何罪至是十三叱登車遣衛士闔其扉徙于上京囚圍堵中乙辛尋遣達魯古撒八往害之太子年方二十上京留守蕭撻得給以疾薨聞上哀之命有司葬龍門山欲召其妃乙辛陰遣人殺之州後知其冤悔恨無及諡曰昭懷太子以天子禮改葬玉峯山乾統初追尊大孝順聖皇帝廟號順宗妃蕭氏貞順皇后一子延禧卽天祚皇帝

論曰道宗知太子之賢而不能辨乙辛之詐竟絕父子之親爲萬世惜乙辛知爲一身之計不知有君臣之義豈復知有太子乎姦邪之臣亂人家國如此可不戒哉可不戒哉

晉王小字敖盧幹天祚皇帝長子母曰文妃蕭氏甫髫亂馳馬善射出爲大丞相耶律隆運後封晉王性樂道人善而矜人不能時宮中見讀書者輒斥敖盧幹嘗入寢殿見小底茶刺閱書因取觀會諸王至陰袖而歸之曰勿令他人見也一時號稱長者及長積有人望內外歸心保大元年南軍都統耶律余覲與其母文妃密謀立之事覺余覲降金文妃伏誅敖盧幹實不與謀免二年耶律撒八等復謀立不克上知敖盧幹得人心不忍加誅令縊殺之或勸之亡敖盧幹曰安忍爲藁爾之軀而失臣子之大節就死聞者

傷之

論曰天祥不君臣下謀立其子適以殺之敖盧斡重君父之命不亡而死申生其恭矣乎

遼史卷七十二考證

義宗傳義宗小字圖欲○圖欲五代新史作突欲

攜高美人載書浮海而去唐以天子儀衛迎倍以莊宗后夏氏妻之賜姓李名贊華○臣浩按五代會要

莊宗昭容夏氏封號國夫人五代舊史曰明宗入洛莊宗宮人數百悉令歸其骨肉惟夏氏無所歸贊

華來歸以妻贊華據此則莊宗后三字有誤

遼史卷七十二考證

元 中 書 右 丞 相 總 裁 脫 脫 等 修

列傳第三

耶律曷魯 阿古只 耶律斜捏赤 老古 顏德 耶律欲繼 耶律海里

耶律曷魯字控温一字洪隱迭刺部人祖匣馬萬簡憲皇帝兄父偶思遙輦時為本部夷裔曷魯其長子也性質厚在髫髻與太祖遊從父釋魯奇之曰與我家者必二兒也太祖既長相與易裘馬為好然曷魯事太祖彌謹會滑哥弒其父釋魯太祖顧曷魯曰滑哥弒父料我必不能容將反噬我今彼歸罪臺晒為解我姑與之是賊吾不忘也自是曷魯常佩刀從太祖以備不虞居久之曷魯父偶思病召曷魯曰阿保機神略天授汝率諸弟赤心事之已而太祖來問疾偶思執其手曰爾命世奇才吾兒曷魯者他日可委以事吾已諭之矣既而以諸子屬之太祖為撻馬狝沙里參預部族事曷魯領數騎召小黃室韋來附太祖素有大志而知曷魯賢軍國事非曷魯議不行會討越兀與烏古部曷魯為前鋒戰有功及太祖為迭刺部夷裔董討奚部其長朮里偪險而壘攻莫能下命曷魯持一箭往諭之既入為所執迺說奚曰契丹與奚言語相通實一國也我夷裔董於奚豈有較轢之心哉漢人殺我祖奚首夷裔董怨次骨日夜思

報漢人顧力單弱使我求援於奚傳矢以示信耳夷裔受命於天撫下以德故能有此衆也今奚殺我
違天背德不祥莫大焉且兵連禍結當自此始豈爾國之利乎朮里感其言乃降太祖爲于越秉國政欲
命曷魯爲迭刺部夷裔辭曰賊在君側未敢遠去太祖討黑車子室韋幽州劉仁恭遣養子趙霸率衆
來救曷魯伏兵桃山俟霸衆過半而要之與太祖合擊斬獲甚衆遂降室韋太祖會李克用于雲州時曷
魯待克用顧而壯之曰偉男子爲誰太祖曰吾族曷魯也會遙輦痕德堇可汗歿羣臣奉遺命請立太祖
太祖辭曰昔吾祖夷裔雅里魯以不當立而辭今若等復爲是言何歟曷魯進曰曩吾祖之辭遺命弗
及符瑞未見第爲國人所推戴耳今先君言猶在耳天人所與若合符契天不可逆人不可拂而君命不
可違也太祖曰遺命固然汝焉知天道曷魯曰聞于越之生也神光屬天異香盈幄夢受神誨龍錫金佩
天道無私必應有德我國削弱齟齬於隣部日久以故生聖人以興起之可汗知天意故有是命且遙輦
九營葦布非無可立者小大臣民屬心于越天也昔者于越伯父釋魯魯曰吾猶蛇兒猶龍也天時人事
幾不可失太祖猶未許是夜獨召曷魯責曰衆以遺命追我汝不明吾心而亦俛隨耶曷魯曰在昔夷裔
雅里雖推戴者衆辭之而立阻午爲可汗相傳十餘世君臣之分亂紀綱之統曠委質他國若綴旒然
羽檄遽午民疲奔命與王之運實在今日應天順人以答顧命不可失也太祖乃許明日卽皇帝位命曷

魯總軍國事時制度未講國用未充屢從未備而諸弟刺萬等往往覬非望太祖宮行營始置腹心部選諸部豪健二千餘充之以曷魯及蕭敵魯總焉已而諸弟之亂作太祖命曷魯總領軍事討平之以功爲迭刺部夷窩董時民更兵焚剽日以抗敵曷魯撫輯有方畜牧盛滋民用富庶乃討烏古部破之自是震懼不敢復叛迺請制朝儀建元率百官上尊號太祖旣備禮受冊拜曷魯爲阿魯敦于越阿魯敦者遼言盛名也後太祖伐西南諸夷數爲前鋒神冊二年從逼幽州與唐節度使周德威拒戰可汗州西敗其軍遂圍幽州未下太祖以時暑班師留曷魯與盧國用守之俄而救兵繼至曷魯等以軍少無援退三年七月皇都旣成燕擊臣以落之曷魯是月得疾薨年四十七旣葬賜名其阡宴答山曰于越峪詔立石紀功清盜間命立祠上京初曷魯病革太祖臨視問所欲言曷魯曰陛下聖德寬仁羣生成寇遂帝業隆興臣旣蒙寵遇雖瞑目無憾惟析迭刺部讜未決願亟行之及薨太祖流涕曰斯人若登三五載吾謀蔑不濟矣後太祖二十一功臣各有所擬以曷魯爲心云子惕刺撒刺俱不仕

論曰曷魯以肺腑之親任帷幄之寄言如著龜謀成戰勝可謂算無遺策矣其君臣相得之誠庶吳漢之於光武歟夫信其所可信智也太祖有焉故曰惟聖知聖惟賢知賢斯近之矣

蕭敵魯字敵鞏其母爲德祖女弟而瀆欽皇后又其女兄也五世祖曰胡母里遙鞏氏時嘗使唐唐留之

幽州一夕折關遁歸國由是世爲決獄官敵魯性寬厚膂力絕人習軍旅事太祖潛藩日侍左右凡征討必與行陣既卽位敵魯與弟阿古只耶律釋魯耶律昌魯皆總宿衛拜敵魯北府宰相世其官太祖征奚及討劉守光敵魯略地海濱殺獲甚衆頃之刺葛等作亂潰而北走敵魯率輕騎追之兼晝夜行至榆河敗其黨獲刺葛以獻太祖嘉之錫賚甚渥後討西南夷功居諸將先神冊三年十二月卒敵魯有膽略聞敵所在卽馳赴親冒矢石前後戰未嘗少衄必勝乃止以故在太祖功臣列喻以手云弟阿古只

阿古只字撒本少卓越自放不羈長騎勇善射臨敵敢前每射甲楯輒洞貫太祖爲于越時以材勇充任使既卽位與敵魯總腹心部刺葛之亂也瀆欽皇后軍黑山阻險自固太祖方經略奚地命阿古只統百騎往衛之逆黨迭里特耶律滑哥素憚其勇略相戒曰是不可犯也刺葛既北走與敵魯追擒于榆河神冊初元討西南夷有功徇山西諸郡縣又下之敗周德威軍三年以功拜北府宰相世其職天贊初與王郁略地燕趙破磁窯鎮太祖西征悉諉以南面邊事攻渤海破扶餘城獨將騎兵五百敗老相軍三萬渤海既平改東丹國頃之已降郡縣復叛盜賊蜂起阿古只與康默記討之所向披靡會賊游騎七千自鴨綠府來擾勢張甚阿古只帥麾下精銳直犯其鋒一戰克之斬馘二千餘遂進軍破回跋城以病卒功臣中喻阿古只爲耳云子安圖官至右皮室詳穩

耶律斜涅赤字撒剌大院部舍利曩古直之族始字鐸益早隸太祖幕下嘗有疾賜酒飲而愈還言酒
尊曰撒剌故詔易字爲太祖卽位掌腹心部天贊初分迭刺部爲北南院斜涅赤爲北院夷离堇帝西征
至洸沙威聲大振諸夷潰散迺命斜涅赤撫集之及討渤海破扶餘城斜涅赤從太子大元帥率衆夜圍
忽汗城大譟譟降已而復叛命諸將分地攻之詰旦斜涅赤感勵士伍鼓譟登陴敵震懾莫敢禦遂破之
天顯中卒年七十居佐命功臣之一煙老古頗德

老古字撒懶其母瀆欽皇后姊也老古幼養宮掖旣長沉毅有勇略隸太祖帳下旣卽位屢有戰功刺萬
之亂也欲乘我不備爲掩襲計給降太祖將納之命老古耶律欲穩嚴號令勒士卒控轡以防其變逆黨
知有備懼而遁以功授右皮室詳穩典宿衛太祖侵燕趙過唐兵雲碧店老古恃勇輕敵直犯其鋒戰久
之被數創歸營而卒太祖深悼惜之佐命功臣其一也

頗德字兀古鄰弱冠事太祖天顯初爲左皮室詳穩典宿衛遷南院夷离堇治有聲石敬瑭破張敬達軍
於太原北時頗德勒兵爲援敬達遁敬瑭追至晉安寨圍之頗德領輕騎襲潞州塞其餉道唐諸將懼殺
敬達以降會同初改迭刺部夷离堇爲大王卽拜頗德旣而加採訪使舊制肅祖以下宗室稱院德祖宗
室號三父房稱橫帳百官子弟及籍没人稱著帳耶律斜的言橫帳班列不可與北南院並太宗詔在廷

議皆曰然乃詔橫帳班列居上頗德奏曰臣伏見官制北南院大王品在惕隱上今橫帳始圖爵位之高
願與北南院參任茲又恥與同列夫橫帳與諸族皆臣也班列奚以異帝乃諭百官曰朕所不知卿等不
宜面從詔仍舊制其強直不撓如此頗德狀貌秀偉初太祖見之曰是子風骨異常兒必爲國器後果然
卒年四十九

耶律欲穩字轄刺于突呂不部人祖臺押遙輦時爲北邊拽刺簡獻皇后與諸子之權難也嘗倚之以免
太祖思其功不忘又多欲穩嚴重有濟世志乃命典司近部以過諸族窺覲之想欲穩既見器重益感奮
思報太祖始置宮分以自衛欲穩率門客首附宮籍帝益嘉其忠詔以臺押配享廟廷及平刺葛等亂以
功遷奚迭刺部夷窩董從征渤海有功天顯初卒後諸帝以太祖之與欲穩也爲故往往取其子孫爲友
宮分中稱八房皆其後也弟霞里終奚大部禿里

耶律海里字涅刺昆遙輦昭古可汗之裔太祖傳位海里與有力焉初受命屬籍比局萌覬覦而遙輦故
族尤觖望海里多先帝知人之明而素服太祖威德獨歸心焉以故太祖託爲耳目數從征討既清內亂
始置遙輦做穩令海里領之天顯初征渤海海里將遙輦紮破忽汗城師班卒

元中書右丞相總裁脫脫等修

列傳第四

耶律敵刺

蕭痕篤

康默記

延壽

韓延徽

德樞紹芳

資讓

韓知古

匡嗣

德源

德凝

耶律敵刺字合魯隱遙章鮮質可汗之子太祖踐阼與敵穩海里同心輔政太祖知其忠實命掌禮儀且
憇以軍事後以平內亂功代轄里為奚六部吐里卒敵刺善騎射頗好禮文

蕭痕篤字元里軫迭刺部人其先相遙章氏痕篤少慷慨以才能自任早隸太祖帳下數從征討既踐阼
除北府宰相痕篤事親孝為政尙寬簡

康默記本名照少為薊州衙校太祖侵薊州得之愛其材隸摩下一切蕃漢相涉事屬默記折衷之悉合
上意時諸部新附文法未備默記推析律意論決重輕不差毫釐權禁網者人人自以為不冤頃之拜左

尙書神冊三年始建都默記董役人咸勸趨百日而訖事五年為皇都夷離畢會太祖出師居庸關默
記將漢軍進逼長蘆水寨俘馘甚眾天贊四年親征渤海默記與韓知古從後大譴譏叛命諸將攻之默

記分薄東門率驍勇先登既拔與韓延徽下長嶺府軍還已下城邑多叛默記與阿古只平之既破回跋

城歸營太祖山陵畢卒佐命功臣其一也孫延壽字胤昌少儻謂其所親大丈夫爲將當效節邊垂馬革裹屍景宗特授千牛衛大將軍宋人攻南京諸將旣成列延壽獨奮擊陣前敵遂大潰以功遙授保大軍節度使乾寧三年卒

韓延徽字藏明幽州安次人父夢殷累官勳儒順三州刺史延徽少英燕帥劉仁恭奇之召爲幽都府文學平州錄事參軍同馮道祇候院授幽州觀察度支使後守光爲帥延徽來聘太祖怒其不屈留之述律后諫曰彼秉節弗撓賢者也奈何困辱之太祖召與語合上意立命參軍事攻党項室韋服諸部落延徽之籌居多乃請樹城郭分市里以居漢人之降者又爲定配偶教墾藝以生養之以故逃亡者少居久之慨然懷其鄉里賦詩見意遂亡歸唐已而與他將王緘有隙懼及難乃省親幽州匿故人王德明舍德明闕所適延徽曰吾將復走契丹德明不以爲然延徽笑曰彼失我如失左右手其見我必喜旣至太祖闕故延徽曰忘親非孝棄君非忠臣雖挺身逃臣心在陛下臣是以復來上大悅賜名曰匡列匡列遼言復來也卽命爲守政事令崇文館大學士中外事悉令參決天贊四年從征渤海大譴譖乞降旣而復叛與諸將破其城以功拜左僕射又與康默記攻長嶺府拔之師還太祖崩哀動左右太宗朝封魯國公仍爲政事令使晉遷改南京三司使世宗朝遷南府宰相建政事省設張理具稱盡力吏天祿三年六月河東

使請行冊禮帝召延徽定其制延徽奏一遵太宗冊晉帝禮從之應麻中致事子德樞鎮東平詔許每歲東歸省九年卒年七十八上聞震悼贈尙書令葬幽州之魯郭世爲崇文令公初延徽南奔太祖夢白鶴自帳中出比還復入帳中詰旦謂侍臣曰延徽至矣已而果然太祖初元庶事草創凡營都邑建宮殿正君臣定名分法度井井延徽力也爲佐命功臣之一子德樞德樞年甫十五太宗見之謂延徽曰是兒卿家之福朕國之寶真英物也未冠守左羽林大將軍遷特進太尉時漢人降與轉徙者多寓東平丁歲歲饑饉疾癘德樞請往撫字之授遼興軍節度使下車整紛剔蠹恩煦信孚勸農桑興教化期月民獲蘇息入爲南院宣徽使遙授天平軍節度使平灤營三州管內觀察處置等使門下平章事已而加開府儀同三司行侍中封趙國公保寧元年卒孫紹勳紹芳紹勳仕至東京戶部使會大延琳叛被執辭不屈賊以鋸解之憤罵至死紹芳重熙間參知政事加兼侍中時廷議征李元昊力諫不聽出爲廣德軍節度使聞敗嘔血卒孫資讓壽隆初拜中書侍郎平章事會宋徽宗嗣位遣使來報有司按籍有登寶位文坐是出爲崇義軍節度使改鎮遼興卒

韓知古薊州玉田人善謀有識量太祖平薊時知古六歲爲瀉欽皇后兄欲穩所得后来嬪知古從焉未得省見久之負其有怏怏不得志挺身逃庸保以供資用其子匡嗣得親近太祖因問言太祖召見與語

賢之命參謀議神冊初遙授彰武軍節度使久之信任益篤總知漢兒司事兼主諸國禮儀時儀法疏闊知古援據典故參酌國俗與漢儀雜就之使國人易知而行頃之拜左僕射與康默記將漢軍征渤海有功遷中書令天顯中卒爲佐命功臣之一子匡嗣

匡嗣以善醫直長樂宮皇后視之猶子應祿十年爲太祖廟詳穩後宋王喜隱謀叛辭引匡嗣上置不問初景宗在藩邸善匡嗣卽位拜上京留守頃之王燕改南京留守保寧末以留守攝樞密使時耶律虎古使宋還言宋人必取河東合先事以爲備匡嗣誡之白寧有是已而宋人果取太原乘勝逼燕匡嗣與南府宰相沙惕隱休哥使宋軍于滿城方陣宋人請降匡嗣欲納之休哥曰彼軍氣甚銳疑誘我也可整頓士卒以禦匡嗣不聽俄而宋軍鼓譟薄我衆感踐塵起漲天匡嗣倉卒諭諸將無當其鋒衆旣奔遇伏兵扼要路匡嗣棄旗鼓遁其衆走易州山獨休哥收所棄兵械全軍還帝怒匡嗣數之曰違爾衆謀深入敵境爾罪一也號令不肅行伍不整爾罪二也棄我師旅挺身鼠竄爾罪三也偵候失機守禦弗備爾罪四也捐棄旗鼓損威辱國爾罪五也促令誅之皇后引諸內戚徐爲開解上重違其請良久威稍霽乃杖而免之旣而遙授晉昌軍節度使乾亨二年改西南面招討使卒睿智皇后聞之遣使臨弔賻贈甚厚後追贈尚書令五子德源德讓後賜名隆運德威德崇德凝德源德凝附傳餘各有傳

德源性愚而貪早侍景宗邸及卽位列近侍統和間官崇義興國二軍節度使加檢校太師以賄名德贍貽書諫之終不悛以故論者少之後加同政事門下平章事遙攝保寧軍節度使乾亨初卒

德凝謙遜廉謹保寧中遷護軍司徒開泰中累遷護衛太保都宮使崇義軍節度使移鎮廣德秩滿部民請留從之改西南面招討使党項隆益笮叛平之遷大同軍節度使卒于官子郭三終天德軍節度使孫高家奴終南院宣徽使高十終遼興軍節度使

遼史卷七十四

元 中 書 右 丞 相 總 裁 脫 脫 等 修

列傳第五

耶律覲烈 羽之 耶律鐸臻 古突呂不 王郁 耶律圖魯賓

耶律覲烈字兀里軫大院部蒲古只夷裔董之後父偶思亦為夷裔董初太祖為于越時覲烈以謹履寬
恕見器使既即位兄曷魯典宿衛以故覲烈入侍帷幄與聞政事神冊三年曷魯薨命覲烈為迭刺部夷
裔董屬以南方事會討党項皇太子為先鋒覲烈副之軍至天德雲內分道並進覲烈率偏師渡河力戰
斬獲甚眾天贊初析迭刺部為北南院羅夷裔董時大元帥率師由古北口略燕地覲烈徇山西所至城
堡皆下太祖嘉其功錫賚甚厚從伐渤海拔扶餘城留覲烈與寅底石守之天顯二年留守南京十年卒
年五十六弟羽之

羽之小字兀里字寅底晒幼蒙襲不羣長嗜學通諸部語太祖經營之初多預軍謀天顯元年渤海平立
皇太子為東丹王以羽之為中臺省右次相時人心未安左大相迭刺不踰月薨羽之莅事勤恪威信並
行太宗即位上表曰我大聖天皇始有東土擇賢輔以撫斯民不以臣愚而任之國家利害敢不以聞渤

海昔畏南朝阻險自衛居忽汗城今去上京遼邈既不爲用又不罷戍果何爲哉先帝因彼離心乘釁而動故不戰而克天授人與彼一時也遣種濩以蕃息今居遠境恐爲後患梁水之地乃其故鄉地衍土沃有木鐵鹽魚之利乘其微弱徙還其民萬世長策也彼得故鄉又獲木鐵鹽魚之饒必安居樂業然後選徒以翼吾左突厥党項室韋夾輔吾右可以坐制南邦混一天下成聖祖未集之功貽後世無疆之福表奏帝嘉納之是歲詔徙東丹國民於梁水時稱其善人皇王奔唐羽之鎮撫國人一切如故以功加守太傅遷中臺省左相會同初以冊禮赴闕加特進表奏左次相渤海蘇貪墨不法事卒子和里終東京留守耶律鐸臻字敵鞏六院部人祖蒲古只遙輦氏時再爲本部夷裔董耶律狼德等既害玄祖暴橫益肆蒲古只以計誘其黨悉誅夷之鐸臻幼有志節太祖爲于越常居左右後卽位梁人遣使求轅軸材太祖難之鐸臻曰梁名求材實覘吾輕重宜答曰材之所生必深山窮谷有神司之須白鼻赤驢禱祠然後可伐如此則其語自塞矣已而果然天贊三年將伐渤海鐸臻諫曰陛下先事渤海則西夏必躡吾後請先西討庶無後顧憂太祖從之及溘欽皇后稱制惡鐸臻囚之誓曰鐵鎖朽當釋汝旣而召之使者欲去鎖鐸臻辭曰鐵未朽可釋乎后聞嘉歎趣召釋之天顯二年卒弟古突呂不

古字涅刺昆初名霞馬葛太祖爲于越嘗從略地山右會李克用於雲州古侍克用異之曰是兒骨相非

常不宜使在左右以故太祖頗忌之時方西討諸弟亂作聞變太祖問古與否曰無喜曰吾無患矣趣召古議古陳殄滅之策後皆如言以故錫賚甚厚神冊末南伐以古佐右皮室詳穩老古與唐兵戰于雲碧唐老古中流矢傷甚太祖疑古陰害之古知上意跪曰陛下疑臣恥居老古麾下耶及今老古在請遣使問之太祖使問老古對曰臣於古無可疑者上意乃釋老古卒遂以古爲右皮室詳穩既卒太祖謂左右曰古死猶長松自倒非吾伐之也

突呂不字鐸衰幼聰敏嗜學事太祖見器重及製契丹大字突呂不贊成爲多未幾爲文班林牙領國子博士知制誥明年受詔撰決獄法太祖略燕詔與皇太子及王郁攻定州師還至順州幽州馬步軍指揮使王千率衆來襲突呂不射其馬躡擒之天贊二年皇子堯骨爲大元帥突呂不爲副既克平州進軍燕趙攻下曲陽北平至易州易人來拒踰濠而陣李景章出降言城中人無鬪志大元帥將修攻具突呂不諫曰我師遠來人馬疲憊勢不可久留乃止軍還大元帥以其謀聞太祖大悅賜賚優渥車駕西征突呂不與大元帥爲先鋒伐党項有功太祖犒師水精山大元帥東歸突呂不留屯西南部復討党項多獲而還太祖東伐大諶譔降而復叛攻之突呂不先登渤海平承詔銘太祖功德于永興殿壁班師已下州郡往往復叛突呂不從大元帥攻破之瀉欽皇后稱制有飛語中傷者后怒突呂不懼而亡太宗知其無罪

召暹天顯三年討烏古部俘獲甚衆伐唐以突呂不爲左翼攻唐軍霞沙寨降之十一年送晉主石敬瑭入洛及大冊突呂不總禮儀事加特進檢校太尉會同五年卒

王郁京兆萬年人唐義武軍節度使處直之孽子伯父處存鎮義武卒三軍推其子郃襲處直爲都知兵馬使光化三年梁王朱全忠攻定州郃遣處直拒于沙河兵敗入城逐郃郃奔太原亂兵推處直爲留後遣人請事梁王梁與晉王克用絕好表處直爲義武軍節度使初郃之亡也郁從之晉王克用妻以女用爲新州防禦使處直料晉必討張文禮鎮亡則定不獨存益自疑陰使郁北導契丹入塞以牽晉兵且許爲嗣郁自奔晉常恐失父心得使大喜神冊六年奉表送款舉室來降太祖以爲養子未幾郁兄都囚父自爲留後帝遣郁從皇太子討之至定州都堅壁不出掠居民而還明年從皇太子攻鎮州遇唐兵于定州破之天贊二年秋郁及阿古只略地燕趙攻下磁窯務從太祖平渤海戰有功加同政事門下平章事改崇義軍節度使太祖崩郁與妻會葬其妻泣訴於瀆欽皇后求歸鄉國許之郁奏曰臣本唐主之婿王已被弑此行夫妻豈能相保願常侍太后后喜曰漢人中惟王郎最忠孝以太祖嘗與李克用約爲兄弟故也尋加政事令還宜州卒

耶律圖魯魯字阿魯隱肅祖子治脊之孫勇而有謀略太宗立晉之役其父敵魯古爲五院東高麗歿于

兵帝卽以其職授圖魯窘會同元年改北院大王營屏左右與議大事占對合上意從討石重貴杜重威擁十萬餘衆拒滹沱橋力戰數日不得進帝曰兩軍爭渡人馬疲矣計安出諸將請緩師爲後圖帝然之圖魯窘厲色進曰臣愚竊以爲陛下樂於安逸則謹守四境可也旣欲擴大疆宇出師遠攻詎能無慮慮若中路而止適爲賊利則必陷南京夷屬邑若此則爭戰未已吾民無莫枕之期矣且彼步我騎何慮不克况漢人足力弱而行緩如選輕銳騎先絕其餉道則事蔑不濟矣帝喜曰國強則其人賢海巨則其魚大於是塞其餉道數出師以牽撓其勢重威果降如言以功獲賜甚厚明年春卒軍中論曰神冊初元將相大臣拔起風塵之中翼扶王運以任職取名者固一時之材亦由太祖推誠御下不任獨斷用能總攬羣策而爲之用歟其投天隙而列功庸至有心腹耳目手足之諭豈偶然哉討覺項走敵魯平刺葛定渤海功亦偉矣若默記治獄不寃頗得持論不撓延徽立經陳紀紹勳秉節而死圖魯窘料敵制勝豈器博者無近用道長者其功遠歟稱爲佐命固宜

遼史卷七十五

遼史卷七十五考證

王郁傳郁兄都囚父自爲留後帝遣郁討之至定州都堅壁不出掠居民而還○臣長發按實治通鑑望
都之敗契丹主實王郁繫之以歸自是不聽其謀遼史不載其事

遼史卷七十五考證

遼史卷七十六

元 中 書 右 丞 相 總 裁 脫 脫 等 修

列傳第六

耶律解里

耶律拔里得

耶律朔古

耶律魯不古

趙延壽

高模翰

趙思溫

耶律漚里思

張礪

耶律解里字濊單突呂不部人世爲小吏解里早隸太宗麾下擢爲軍校天顯間唐攻定州既陷解里爲唐兵所獲晉高祖立始歸國太宗賞其罪拜御史大夫會同九年伐晉師次滹沱河奪中渡橋降其將杜重威上命解里與降將張彥澤率騎兵三千疾趨河南所至無敢當其鋒既入汴解里等遷晉王重貴于開封府彥澤恣殺掠亂宮掖解自不能禁百姓騷然莫不怨憤車駕至京數彥澤罪斬于市汴人大悅解里亦被請責尋釋之天祿間加守太子太傅應祿初置本部令穩解里世其職卒

耶律拔里得字孩鄰太祖弟刺葛之子太宗卽位以親愛見任會同七年討石重貴拔里得進圍德州下之擒刺史師居瑠等二十七人九年再舉兵次滹沱河降杜重威戰功居多太宗入汴以功授安國軍節度使總領河北道事師還州郡往往叛以應劉知遠拔里得不能守而歸世宗卽位遷中京留守卒

耶律朔古字彌骨頂橫帳孟父之後幼爲太祖所養既冠爲右皮室詳穩從伐渤海戰有功天顯七年授三河烏古部都詳穩平易近民民安之以故久其任會同間爲惕隱時晉主石重貴渝盟帝親征晉將杜重威擁衆拒溥沱月餘帝由他渡濟朔古與趙延壽據中渡橋重威兵却遂降是歲入汴世宗卽位朔古奉太宗喪歸上京佐皇太后出師坐是免官卒

耶律魯不古字信靈太祖從姪也初太祖制契丹國字魯不古以贊成功授林牙監修國史後率偏師爲西南邊大詳穩從伐党項有功會河東節度使石敬瑭爲其主所討遣人求援魯不古導送于朝如其請帝親率師往援魯不古從擊唐將張敬瑭于太原北敗之會同初從討党項俘獲最諸將師還天冊中拜

于越六年爲北院大王終年五十五

趙延壽本姓劉恆山人父邨令褚夷開平初滄州節度使劉守文陷褚其裨將趙得鈞獲延壽養以爲子少美容貌好書史唐月宗先以女妻之及卽位封其女爲興平公主拜延壽駙馬都尉樞密使明宗子從

榮侍

舊

本以屬內外莫不震懼延壽求補外避之出爲宣武軍節度使清泰初加魯國公復爲樞密使鎮許

州石敬瑭發兵太原唐遣張敬達往討會敬達敗保晉安寨延壽與德鈞往救聞晉安已破走團栢峪太

事天顯末以延壽妻在晉詔取之以歸自是益自激昂圖報會同初帝幸其第加政事令冬晉人背盟帝親征延壽爲先鋒下貝州授魏博等州節度使封魏王敗晉軍于南樂獲其將賽項羽軍元城晉將李守貞高行周率兵來逆破之至頓丘會大霖雨帝欲班師延壽諫曰晉軍屯河濱不敢出戰若徑入澶州奪其橋則晉不足干上然之適晉軍先歸澶州高行周至析城延壽將輕兵逆戰上親督騎士夾其陣敵遂潰師還留延壽徇貝冀深三州八年再伐晉晉主遣延壽族人趙行實以書來招時晉人堅壁不出延壽給曰我陷虜久寧忘父母之邦若以軍逆我卽歸晉人以爲然遣杜重威率兵迎之延壽至滹沱河據中渡橋與晉軍力戰手殺其將王靖兩軍相拒太宗潛由他渡濟留延壽與耶律朔古據橋敵不能奪屢敗之杜重威埽厥衆降上喜賜延壽龍鳳赭袍且曰漢兵皆爾所有爾宜親往撫慰延壽至營杜重威李守貞迎謁馬首後太宗克汴延壽因李崧求爲皇太子上曰吾於魏王雖割肌肉亦不惜但皇太子須天子之子得爲魏王豈得爲也蓋上嘗許滅晉後以中原帝延壽以故摧堅破敵延壽常以身先至是以崧達意上命遷延壽秩翰林學士承旨張彧進擬中京留守大丞相錄尙書事都督中外諸軍事上鑿錄尙書事都督中外諸軍事世宗卽位以翌戴功授樞密使天祿二年薨

高模翰一名松渤海人有膂力善騎射好談兵初太祖平渤海模翰避地高麗王妻以女因罪亡歸坐使

酒殺人下獄太祖知其才賁之天顯十一年七月唐遣張敬達楊光遠帥師五十萬攻太原勢銳甚石敬瑭遣人求救太宗許之九月徵兵出太原模翰與敬達軍接戰敗之太原圍解敬瑭夜出謁帝約爲父子帝召模翰等賜以酒饌親饗士卒士氣益振翌日復戰又敗之敬達鼠竄晉安寨模翰獻俘于帝會敬瑭自立爲晉帝光遠斬敬達以降諸州悉下上諭模翰曰朕自起兵百餘戰卿功第一雖古名將無以加乃授上將軍會同元年冊禮告成宴百官及諸國使于二儀殿帝指模翰曰此國之勇將朕統一天下斯人之力也羣臣皆稱萬歲及晉叛盟出師南伐模翰爲統軍副使與僧暹前驅拔赤城破德貝諸寨是冬兼總左右鐵鷁子軍下關南城邑數十三月勅虎官楊覃赴乾寧軍爲滄州節度使田武名所圍模翰與趙延壽聚議往救俄有光自模翰目中出縈繞旗矛燄燄如流星久之模翰喜曰此天贊之祥遂進兵殺獲甚衆以功加侍中略地鹽山破饒安晉人震怖不敢接戰加太傅晉以魏府節度使杜重威領兵三十萬來拒模翰謂左右曰軍法在正不在多以多陵少不義必敗其晉之謂乎詰旦以麾下三百人逆戰殺其先鋒梁漢璋餘兵敗走手詔褒美此漢之李陵頃之杜重威等復至滹沱河帝召模翰問計上善其言曰諸將莫及此乃令模翰守中渡橋及戰復敗之上曰朕憑高觀兩軍之勢顧卿英銳無敵如鷹逐雉當圖形麟閣爵賜後裔已而杜重威等降車駕入汴加特進檢校太師封愬郡開國公賜璽書劍器爲汴州

巡檢使平汜水諸山土賊遷鎮中京天祿二年加開府儀同三司賜對衣鞍勒名馬應麻初召爲中臺省右相至東京父老歡迎曰公起戎行致身富貴爲鄉里榮相如買臣輩不足過也九年正月遷左相卒

趙思溫字文美盧龍人少果銳膂力兼人隸燕帥劉仁恭幕李存勗問罪于燕思溫統偏師拒之流矢中目裂裳漬血戰猶不已爲存勗將周德威所擒存勗壯而釋其縛久之日見信用與梁戰於莘縣以驍勇聞授平州刺史兼平營薊三州都指揮使神冊二年太祖遣大將經略燕地思溫來降及伐渤海以思溫爲漢軍都團練使力戰拔扶餘城身被數創太祖親爲調藥太宗卽位以功擢檢校太保保靜軍節度使天顯十一年唐兵攻太原石敬瑭遣使求救上命思溫自嵐憲間出兵援之旣罷兵改南京留守盧龍軍節度使管内觀察處置等使開府儀同三司兼侍中賜協謀靜亂聖功臣尋改臨海軍節度使會同初從耶律牒孛使晉行冊禮還加檢校太師二年有星隕于庭卒上遣使賻祭贈太師魏國公子延昭延靖官至使相

耶律漚里思六院夷窩董蒲古只之後負勇略每戰被重鎧揮鐵槊所向披靡會同間伐晉上至河而漚適海東青鶻搏雉晉人隔水以鴿引去上顧左右曰誰爲我得此人漚里思請內廐馬濟河擒之并殺殺者數人還上大悅優加賞賚旣而晉將杜重威逆于望都據水勒戰漚里思介馬突陣餘軍繼之被圍衆

言陣薄處可出瀋里思曰恐彼有他備竟引兵衝堅而出迴視衆所指皆大塹也其料敵多此類是年總領敵烈皮室軍坐私免部曲奪官卒

張礪磁州人初仕唐爲掌書紀遷翰林學士會石敬瑭起兵唐主以礪爲招討判官從趙德鈞援張敬達于河東及敬達敗礪入契丹後太宗見礪剛直有文彩擢翰林學士礪臨事必盡言無所避上益重之未幾謀亡歸爲追騎所獲上責曰汝何故亡礪對曰臣不習北方土俗飲食居處意常鬱鬱以是亡耳上顧通事高彥英曰朕嘗戒汝晉遇此人何乃使失所而亡礪去可再得耶遂杖彥英而謝礪會同初陞翰林承旨兼吏部尙書從太宗伐晉入汴諸將蕭翰耶律郎五麻答輩肆殺掠礪奏曰今大遼始得中國宜以中國人治之不可專用國人及左右近習苟政令乖失則人心不服雖得之亦將失之上不聽改右僕射兼門下侍郎平章事頃之車駕北還至樂城崩時礪在恆州蕭翰與麻答以兵圍其第礪方臥病出見之翰數之曰汝何故於先帝言國人不可爲節度使我以國舅之親有征伐功先帝留我守汴以爲宣武軍節度使汝獨以爲不可又譖我與解里好掠人財物子女今必殺汝趣令鎖之礪抗聲曰此國家大體安危所繫吾實言之欲殺卽殺奚以鎖爲麻答以礪大臣不可專殺乃救止之是夕礪恚憤卒

論曰初晉因遼之兵而得天下故兼臣禮而父事之割地以爲壽輸帛以爲貢未久也而會同之師次淖

地矣豈學帥貪功黷武而致然歟抑所謂信不由衷也哉模翰以功名自終可謂良將若延壽之勳雖著
至於覬覦儲位謬矣利令智昏固無足議若乃成未豐以虧儲功如解里者何譏焉

遼史卷七十六考證

趙廷壽傳世宗卽位以翌戴功授樞密使天祿二年薨○臣浩按廷壽之圖自立世宗之執廷壽通鑑紀

載甚詳遼史皆不載

趙思溫傳子延昭○

臣人龍

按延昭通鑑作延照爲石晉邢州刺史

遼史卷七十六考證

元 中 書 右 丞 相 總 裁 脫 脫 等 修

列傳第七

耶律屋質

耶律吼

何魯不

耶律安搏

耶律洼

耶律頽昱

耶律撻烈

耶律屋質字敵鞏系出孟父房姿簡靜有器識重然諾遇事造次處之從容人莫能測博學知天文會同

間為惕隱太宗崩諸大臣立世宗太后聞之怒甚遣皇子李胡以兵逆擊遇安端劉哥等于泰德泉敗歸

李胡盡執世宗臣僚家屬謂守者曰我戰不克先殪此曹人皆恟恟相謂曰若果戰則是父子兄弟相夷

矣軍次潢河橫渡隔岸相拒時屋質從太后世宗以屋質善籌欲行間乃設事奉書以試太后太后得書

以示屋質屋質讀竟言曰太后佐太祖定天下故臣願竭死力若太后見疑臣雖欲盡忠得乎為今之計

莫若以言和解事必有成否則宜速戰以決勝負然人心一搖國禍不淺惟太后裁察太后曰我若疑卿

安肯以書示汝屋質對曰李胡永康王皆太祖子孫神器非移他族何不可之有太后宜思長策與永康

王和議太后曰誰可遣者對曰太后不疑臣臣請往萬一永康王見聽廟社之福太后乃遣屋質授書於

帝帝遣宣徽使耶律海思復書辭多不遜屋質諫曰書意如此國家之憂未艾也能釋怨以安社稷則臣

以爲莫若和好帝曰彼衆烏合安能敵我屋質曰卽不敵奈骨肉何況未知孰勝借曰幸勝諸臣之族孰於李胡者無噍類矣以此計之惟和爲善左右聞者失色帝良久問曰若何而和屋質對曰與太后相見各紓忿恚和之不難不然決戰非晚帝然之遂遣海思詣太后約和往返數日議乃定始相見怨言交讎殊無和意太后謂屋質曰汝當爲我畫之屋質進曰太后與大王若能釋怨臣乃敢進說太后曰汝第言之屋質借謁者籌執之謂太后曰昔人皇王在何故立嗣聖太后曰立嗣聖者太祖遺旨又曰大王何故擅立不稟尊親帝曰人皇王當立而不立所以去之屋質正色曰人皇王捨父母之國而奔唐子道當如是耶大王見太后不少遜謝惟怨是尋太后牽于偏愛託先帝遺命妄授神器如此何敢望和當速交戰擲籌而退太后泣曰向太祖遭諸弟亂天下荼毒瘡痍未復庸可再乎乃索籌一帝曰父不爲而子爲又誰咎也亦取籌而執左右感激大慟太后復謂屋質曰議既定神器竟誰歸屋質曰太后若授永康王順天合人復何疑李胡厲聲曰我在兀欲安得立屋質曰禮有世嫡不傳諸弟昔嗣聖之立尙以爲非況公暴戾殘忍人多怨讟萬口一辭願立永康王不可奪也太后顧李胡曰汝亦聞此言乎汝實自爲之乃許立永康帝謂屋質曰汝與朕屬尤近何反助太后屋質對曰臣以社稷至重不可輕付故如是耳上喜其忠天祿二年耶律天德蕭翰謀反下獄湯隱劉哥及其弟盆都結天德等爲亂耶律石剌潛告屋質屋質

運引入見白其事劉哥等不服事遂寢未幾劉哥邀駕觀禱蒲捧觴上壽袖刃而進帝覺命執之親詣其事劉哥自誓帝復不問屋質奏曰當使劉哥與石剌對狀不可輒恕帝曰卿爲朕鞠之屋質率劍士往訊之天德等伏罪誅天德杖翰遷劉哥以益都使轄曼斯國三年表列泰寧王察割陰謀事上不聽五年爲右皮室詳穩秋上祭讓國皇帝于行宮與羣臣皆醉察割弑帝屋質聞有言衣紫者不可失乃易衣而出亟遣人召諸王及喻禁衛長皮室等同力討賊時壽安王歸帳屋質遣弟冲迎之王室尙猶豫屋質曰大王嗣聖子賊若得之必不容羣臣將誰事社稷將誰賴萬一落賊手悔將何及王始悟諸將聞屋質出相繼而至遲明整兵出賊不意圍之遂誅察割亂既平穆宗卽位謂屋質曰朕之性命實出卿手命知國事以逆黨財產盡賜之屋質固辭應歷五年爲北院大王總山西事保寧初宋圍太原以屋質率兵往援至白馬嶺遣勁卒夜出間道疾馳駐太原西鳴鼓舉火宋兵以爲大軍至懼而宵遁以功加于越四年漢劉繼元遣使來貢致幣於屋質屋質以聞帝命受之是年五月薨年五十七帝痛悼輟朝三日後道宗詔上京立祠祭享樹碑以紀其功云

耶律吼字曷魯大院部夷离堇蒲古只之後端懿好施不事生產太宗特加倚任會同六年爲南院大王蒞事精簡人不敢以年少易之時晉主石重貴表不稱臣辭多踞慢吼言晉罪不可不伐及帝親征以所

部兵從既入汴諸將皆取內帑珍異吼獨取馬鎧帝嘉之及帝崩于樂城無道詔軍中憂懼不知所爲吼詣北院大王耶律洼議曰天位不可一日曠若請于太后則必屬李胡李胡暴戾殘忍詎能子民必欲厭人望則當立永康王洼然之會耶律安搏來意與吼合遂定議立永康王是爲世宗頃之以功加採訪使賜以寶貨吼辭曰臣位已高敢復求富臣從弟的孫諸子坐事籍沒陛下哀而出之則臣受賜多矣上曰吼合重賞以族人爲請其賢遠甚許之仍賜宮戶五十時有取當世名流作七賢傳者吼與其一夫天祿三年卒年三十九子何魯不

何魯不字斜靈嘗與耶律屋質平察割亂穆宗以其父吼首議立世宗故不顯用晚年爲本族敵史及景宗卽位以平察割功授昭德軍節度使爲北院大王時黃龍府軍將燕頗殺守臣以叛何魯不討之破於鴨綠江上不親追擊以至失賊杖之乾亨間卒

耶律安搏曾祖巖木玄祖之長子祖楚不魯爲本部夷离董父迭里幼多疾時太祖爲撻馬狝沙里常加撫育神冊六年爲惕隱從太祖將龍軍討阻卜党項有功天贊三年爲南院夷离董征渤海攻忽汗城俘斬甚衆太祖崩瀆欽皇后稱制欲以大元帥嗣位迭里建言帝位宜先嫡長今東丹王赴朝當立由是忤旨以黨附東丹王詔下獄詞鞫加以炮烙不伏殺之籍其家安搏自幼若成人居父喪哀毀過禮見者傷

之太宗屢加慰諭嘗曰此兒必爲令器既長寡言笑重然諸動遵繩矩事母至孝以父死非罪未葬不預
宴樂世宗在藩邸尤加憐恤安搏密自結納太宗伐晉還至欒城崩諸將欲立世宗以李胡及壽安王在
朝猶豫未決時安搏直宿衛世宗密召問計安搏曰大王聽安寬恕人皇王之嫡長先帝雖有壽安天下
屬意多在大王今若不斷後悔無及會有自京師來者安搏詐以李胡死傳報軍中皆以爲信於是安搏
詣北南二大王計之北院大王汪闡而遽起曰吾二人方議此事先帝嘗欲以永康王爲儲貳今日之事
有我輩在孰敢不從但恐不白太后而立爲國家啟釁安搏對曰大王旣知先帝欲以永康王爲儲副況
永康王賢明人心樂附今天下甫定稍緩則大事去矣若曰太后必立李胡且李胡殘暴行路共知果嗣
位如社稷何南院大王吼曰此言是也吾計決矣乃整軍召諸將奉世宗卽位于太宗柩前帝立以安搏
爲腹心總知宿衛是歲約和于潢河橫渡太后問安搏曰吾與汝有何隙安搏以父死爲對太后默然及
置北院樞密使上命安搏爲之賜奴婢百口寵任無比事皆取決焉然性太寬事循苟簡豪猾縱恣不能
制天祿未察割兵犯御幄又不能討由是中外短之穆宗卽位以立世宗之故不復委用應歷三年或誣
安搏與齊王罽撒葛謀亂繫獄死姪撒給左皮室詳穩

耶律注字敵擊陪國王釋魯孫南院夷高董綰思子少有器識人以公輔期之太祖時雖未官常任以事

太宗卽位爲惕隱天顯末帝援河東洿爲先鋒敗張敬達軍於太原北會同中遷北院大王及伐晉復爲先鋒與梁漢璋戰於瀛州敗之太宗崩于欒城南方州郡多叛士馬困乏軍中不知所爲洿與耶律吼定策立世宗乃令諸將曰大行上賓神器無主永康王人皇王之嫡長天人所屬當立有不從者以軍法從事諸將皆曰諾世宗卽位賜官戶五十拜于越卒年五十四

耶律頽昱字團寧孟父楚國王之後父末掇嘗爲夷离堇頽昱性端直會同中領九石烈部政濟寬猛世宗卽位爲惕隱天祿三年兼政事令封漆水郡王及穆宗立以匡贊功嘗許以本部大王後將葬世宗頽昱懇言於帝曰臣蒙先帝厚恩未能報幸及大葬臣請陪位帝由是不悅寢其議薨

耶律撻烈字涅魯衰大院部郎君襄古直之後沉厚多智有任重才年四十未仕會同間爲邊部令穩慮厓初陞南院大王均賦役勸耕稼部人化之戶口豐殖時周人侵漢以撻烈都統西南道軍授之周已下太原數城漢人不敢戰及聞撻烈兵至周主遣郭從義尙鈞等率精騎拒於忻口撻烈擊敗之獲其將史彥超周軍遁歸復所陷城邑漢主詣撻烈謝及漢主殂宋師來伐上命撻烈爲行軍都統發諸道兵救之旣出鴈門宋諜知而退保寧元年加兼政事令致政乾亨初召之上見鬚髮皓然精力猶健問以政事厚禮之以疾薨年七十九撻烈凡用兵賞罰信明得士卒心河東單弱不爲周宋所併者撻烈有力焉在治

所不修邊幅百姓無稱年穀屢稔時耶律屋質居北院撻烈居南院俱有政迹朝議乃以爲富民大王云
贊曰立嗣以嫡禮也太宗崩非安搏吼津謀而克斷策立世宗非屋質直而能諫杜太后之私折李胡之
暴以成橫渡之約則亂將誰定四臣嘗庶幾春秋首止之功哉

遼史卷七十七

耶律吼傳吼詣北院大王耶律洼議立永康王會耶律安搏來意與吼合遂定議是爲世宗以功加採訪使賜以寶貨從弟的琿諸子賜宮戶五十○臣長發按推戴世宗吼及諸人之功也而本紀于世宗之立並不紀吼及諸臣一語而僅于分賜翼戴諸臣列其名再吼從弟的琿本紀又爲的魯本紀搏爲樞密使而安搏本傳又不之載修史之互異若此

元 中 書 右 丞 相 總 裁 脫 脫 等 修

列傳第八

耶律夷臘萬

蕭海瓌

蕭護思

蕭思溫

蕭繼先

耶律夷臘萬字蘇散本宮分人檢校太師合魯之子應祿初以父任入侍數歲始爲殿前都點檢時上新卽位疑諸王有異志引夷臘萬爲布衣交一切機密事必與之謀遷寄班都知賜宮戶時上酗酒數以細故殺人有監雉者因傷雉而亡獲之欲誅夷臘萬諫曰是罪不應死帝竟殺之以屍付夷臘萬曰收汝故人夷臘萬終不爲止復有監鹿詳穩亡一鹿下獄當死夷臘萬又諫曰人命至重豈可爲一獸殺之良久得免遼法屢岐角者惟天子得射會秋獵善爲鹿鳴者呼一屢至命夷臘萬射應弦而踏上大悅賜金銀各百兩名馬百匹及黑山東抹真之地後穆宗被弑坐守衛不嚴被誅

蕭海瓌字寅的晒其先遙筆氏時爲本部夷離婁父塔列天顯間爲本部令穩海瓌貌魁偉力過人天祿間娶明王安端女萬因翁主應祿初察劄亂萬因連坐繼娶朝瑰翁主上以近戚嘉其勤篤命預北府宰相選頃之總知軍國事時諸王多坐反逆海瓌爲人廉謹達政體每被命案獄多得其情人無寃者錄

是知名漢主劉承鈞每遣使入貢必別致幣物詔許受之年五十卒帝愍悼輟朝二日

蕭護思字延盜世爲北院吏累遷御史中丞總典羣牧部籍應厯初遷左客省使未幾拜御史大夫時諸王多坐事繫獄上以護思有才幹詔窮治稱旨改北院樞密使仍命世預宰相選護思辭曰臣子孫賢否未知得一客省使足矣從之上晚歲酗酒用刑多濫護思居要地躡躡自保未嘗一言匡救議者以是少之年五十七卒

蕭思溫小字寅古宰相敵魯之族弟忽沒里之子通書史太宗時爲奚禿里太尉尙燕國公主爲羣牧都林牙思溫在軍中握輒修邊幅僚佐皆言非將帥才尋爲南京留守初周人攻揚州上遣思溫躡其後憚暑不敢進拔緣邊數城而還後周師來侵圍馮母鎮勢甚張思溫請益兵帝報曰敵來則與統軍司併兵拒之敵去則務農作勿勞士馬會敵入東城我軍退渡淖沱而屯思溫勒兵徐行周軍數日不動思溫與諸將議曰敵衆而銳戰不利則有後患不如頓兵以老其師躡而擊之可以必勝諸將從之遂與統軍司兵會飾他說請濟師周人引退思溫亦還已而周主復北侵與其將傅元卿李崇進等分道並進圍瀛州陷益津瓦橋淤口三關垂迫固安思溫不知計所出但云車駕旦夕至麾下士奮躍請戰不從已而陷具瀛莫等州京齊人皆震駭往往遁入西山思溫以邊防失利恐朝廷罪己表請親征會周主榮以病歸思

温逼至益津僞言不知所在過步卒二千餘人來拒敗之是年開周喪燕民始安乃班師時穆宗酒酒嗜殺思温以密戚預政無所匡輔士論不與十九年春蒐上射熊而中思温與夷离畢牙里斯等進酒上壽帝醉還宮是夜爲庖人斯奴古等所弑思温與南院樞密使高勳飛龍使女里等立景宗保寧初爲北院樞密使兼北府宰相仍命世預其選上冊思温女爲后加尙書令封魏王從帝獵闔山爲賊所害

蕭繼先字楊隱小字留只哥幼穎悟叔思温命爲子睿智皇后尤愛之乾亨初尙齊國公主拜駙馬都尉統和四年宋人來侵繼先率邏騎逆境上多所俘獲上嘉之拜北府宰相自是出師繼先必將本府兵先從拔狼山石壘從破宋軍應州上南征取通利軍戰稱捷力及親征高麗以繼先年老留守上京卒年五十八繼先雖處富貴尙儉素所至以善治稱故將兵攻戰未嘗失利名重戚里

論曰嗚呼人君之過莫大於殺無辜湯之伐桀也數其罪曰並告無辜於上下神祇武王之伐紂也數其罪曰無辜籲天堯之伐苗民也呂侯追數其罪曰殺戮無辜迹是言之夷獵萬之諫廩廩庶幾古君子之風矣雖然善諫者不諫於已然蓋必先得於心術之微而察脉者先其病而治之則易爲功穆宗沈湎失德蓋其資富彊之勢以自肆久矣使羣臣於造次動作之際此諫彼諍提而警之以防其甚則亦詎至是哉予以知護思思温處位優重耽祿取容眞鄙夫矣若海環之折獄繼先之善治可謂任職臣歟

遼史卷七十八考證

蕭思溫傳周主北侵與其將傅元卿李崇進等分道並進圍瀛州陷益津瓦橋淤口三關○臣宗楷按宋

史紀周之取三關自南而北遼史紀遼之失三關自北而南各就其形勢而言至通鑑並無傅元卿將兵者乃宋太祖而李重進則遼史訛爲李崇進也

從帝獵闔山爲賊所害○臣宗楷按女直傳有司案詰女里袖中得殺樞密使蕭思溫賊書賜死高勳傳

勳謀害尙書令蕭思溫詔獄誅之據此則殺思溫之賊乃女里與高勳也

遼史卷七十八考證

遼史卷七十九

元 中 書 右 丞 相 總 裁 脫 脫 等 修

列傳第九

室昉 耶律賢適 女里 郭襲 耶律阿沒里

室昉字夢奇南京人幼謹厚篤學不出外戶者二十年雖里人莫識其精如此會同初登進士第爲盧龍巡捕官太宗入汴受冊禮詔昉知制誥總禮儀事天祿中爲南京留守判官應厯間累遷翰林學士出入禁闈十餘年保靈間兼政事舍人數延問古今治亂得失奏對稱旨上多昉有理劇才改南京副留守決訟平允人皆便之遷工部尙書尋改樞密副使參知政事頃之拜樞密使兼北府宰相加同政事門下平章事乾亨初監修國史統和元年告老不許進尙書無逸篇以諫太后聞而嘉獎二年秋詔修諸嶺路昉發民夫二十萬一日畢功是時昉與韓德讓耶律斜軫相友善同心輔政整析蠹弊知無不言務在息民薄賦以故法度修明朝無異議八年復請致政詔入朝免拜賜几杖太后遣閤門使李從訓持詔勞問令常居南京封鄴國公初晉國公生建佛寺于南京上許賜額昉奏曰詔書悉罪無名寺院今以主請賜額不惟違前詔恐此風愈熾上從之表進所撰實錄二十卷手詔褒之加政事令賜帛六百匹九年薦韓德

讓自代不從上以昉年老苦寒賜貂皮衾褥許乘輦入朝病劇遣翰林學士張幹就第授中京留守加尚
父卒年七十五上嗟悼輟朝二日贈尚書令遺言戒厚葬恐人譽過情自志其墓

耶律賢適字阿古真子越魯不古之子嗜學有大志滑稽玩世人莫之知惟于越屋質器之嘗謂人曰是
人當國天下幸甚應麻中朝臣多以言獲譴賢適樂於靜退游獵自娛與親朋言不及時事會討烏古還
擢右皮室詳穩景宗在藩邸常與韓匡嗣女里等游言或刺譏賢適勸以宜早疎絕由是穆宗終不見疑
賢適之力也景宗立以功加檢校太保尋遙授靈江軍節度使賜推忠協力功臣時帝初踐阼多疑諸王
或萌非望陰以賢適爲腹心加特進同中書門下平章事保寧二年秋拜北院樞密使兼侍中賜保節功
臣三年爲西北路兵馬都部署賢適忠介庸敏推誠待人雖燕息不忘政務以故百司首職罔敢媮惰累
年滯獄悉決之大丞相高勳契丹行宮都部署女里席寵放恣及帝姨母保母勢薰灼一時納賂請謁門
若賈區賢適患之言于帝不報以病解職又不允令鑄手印行事乾亨初疾篤得請明年封西平郡王薨
年五十三子觀音大同軍節度使

女里字涅烈衰逸其氏族補積慶宮人應麻初爲習馬不底以母憂去一日至雅伯山見一巨人惶懼走
巨人止之曰勿懼我地祇也葬爾母於斯當速詣闕必貴女里從之累遷馬羣侍中時景宗在藩邸以女

里出自本宮待選殊厚女里亦傾心耕織及穆宗遇劫女里奔赴景宗是夜集禁兵五百以衛獻卽位以翼戴功加政事令契丹行宮都部署賞賚甚渥尋加守太尉北漢主劉繼元聞女里爲上信任遇其生日必致禮女里素貪同列蕭阿不底亦好賄二人相善人有氈裘爲臬耳子所著者或戲曰若遇女里阿不底必盡取之傳以爲笑其貪猥如此保寧未坐私藏甲五百屬有司方案詰女里袖中又得殺樞密使蕭思溫賊書賜死女里善識馬嘗行郊野見數馬跡指其一曰此奇駿也以己馬易之果然

郭襲不知何郡人性端介識治體久淹外調景宗卽位召見對稱旨知可任以事拜南院樞密使尋加兼政事令以帝數游獵襲上書諫曰昔唐高祖好獵蘇世長言不滿十旬未足爲樂高祖卽日罷史稱其美伏念聖祖創業艱難修德布政宵旰不懈穆宗逞無厭之欲不恤國事天下愁怨陛下繼統海內翕然望中中之治十餘年間征伐未已而寇賊未弭年穀雖登而瘡痍未復正宜戒懼修省以懷永圖側聞恣意遊獵甚於往日萬一有銜檄之變搏噬之虞悔將何及况南有疆敵伺隙而動聞之得無生心乎伏望陛下節從禽酣飲之樂爲生靈社稷計則有無疆之休上覽而稱善賜協贊功臣拜武定軍節度使卒

耶律阿沒里字萍

鄰遙鞏嘲古可汗之四世孫幼聰敏保寧中爲南院宣徽使統和初皇太后稱制與耶

律斜軫參預國論爲

統以征高麗功遷北院宣徽使加政事令四年春宋將曹彬米信等侵燕上親征

乾隆四年校刊

遼史卷七十九列傳

阿沒里為都監屢破敵軍十二年

行在多盜阿沒里立禁捕法盜始息先是叛逆之家兄弟不知情者亦

連坐阿沒里諫曰夫兄弟雖曰同胞

賦性各異

一行逆謀雖不與知輒坐以法是刑及無罪也自今雖同

居兄弟不知情者免連坐太后嘉納著為

令致仕卒阿沒里性好聚斂每從征所掠人口聚而建城請為

豐州就以家奴閭貴為刺史時議鄙之子賢哥

左夷裔畢

論曰景宗之世人望中興豈其勤心庶績而然蓋

承穆宗營虐之餘為善易見亦由羣臣多賢左右弼諧

之力也室昉進無逸之篇郭襲陳諫獵之疏阿沒里請

免同氣之坐所謂仁人之言其利溥哉賢適忠介

亦近世之名臣女里貪猥後人所當取鑑者也

遼史卷七十九考證

室昉傳樞密副使參知政事拜樞密使兼北府宰相同政事門下平章事○臣人龍按百官志止云室

昉爲政事舍人其樞密副使參知政事樞密使北府宰相同政事門下平章事職任甚重竟不載且北府宰相皇族四帳世預其選室昉南京人何爲亦被簡用而景宗本紀又不見室昉宰相之命是其中必有誤也

遠史卷七十九考證

元中書右丞相總裁脫脫等修

傳列第十

張儉 邢抱朴 馬得臣 蕭朴 耶律八哥

張儉宛平人性端慤不事外飾統和十四年舉進士第一調雲州幕官故事車駕經行長吏當有所獻聖宗獵雲中節度使進曰臣境無他產惟幕僚張儉一代之寶願以爲獻先是上夢四人侍側賜食人二口至聞儉名始悟召見容止朴野訪及世務占奏三十餘事由此顧遇特異踐歷清華號稱明幹開泰中累遷同知樞密院事太平五年出爲武定軍節度使移鎮大同六年入爲南院樞密使帝方眷倚參知政事吳叔達與儉不相能帝怒出叔達爲康州刺史拜儉左丞相封韓王帝不豫受遺詔輔立太子是爲興宗賜貞亮弘靖保護守節耆德功臣拜太師中書令加尙父徙王陳重熙五年帝幸禮部貢院及親試進士皆儉發之進見不名賜詩褒美儉衣唯袖帛食不重味月俸有餘贖給親舊方冬奏事便殿帝見衣袍弊惡密令近侍以火夾穿孔記之屢見不易帝問其故儉對曰臣服此袍已三十年時尙奢靡故以此微諷喻之上憐其清貧令恣取內府物儉奉詔持布三端而出益見獎重儉第五人上欲俱賜進士第因辭有

司獲盜八人既戮之乃獲正賊家人訴寃儉三乞申理上勃然曰卿欲朕償命耶儉曰八家老稚無告少加存恤使得收葬足慰存沒矣乃從之儉在相位二十餘年裨益爲多致政歸第會宋書辭不如禮上將親征幸儉第尚食先往具饌却之進葵羹乾飯帝食之美徐問以策儉極陳利害且曰第遣一使問之何必遺勞車駕上悅而止復卽其第賜宴器玩悉與之十二年薨年九十一勅葬宛平縣

邢抱朴應州人邢部郎中簡之子也抱朴性穎悟好學博古保寧初爲政事舍人知制誥累遷翰林學士加禮部侍郎統和四年山西州縣被兵命抱朴鎮撫之民始安加戶部尚書遷翰林學士承旨與室昉同修實錄決南京滯獄還優詔褒美十年拜叅知政事以樞密使韓德讓薦按察諸道守令能否而黜陟之大協人望尋以母憂去官詔起視事表乞終制不從宰相密諭上意乃視事人以孝稱及耶律休哥留守南京又多滯獄復詔抱朴平決之人無寃者改南院樞密使卒贈侍中初抱朴與弟抱質受經于母陳氏皆以儒術顯抱質亦官至侍中時人榮之

馬得臣南京人好學博古善屬文尤長於詩保寧間累遷政事舍人翰林學士常預朝議以正直稱乾亨初宋師屢犯邊命爲南京副留守復拜翰林學士承旨聖宗卽位皇太后稱制兼侍讀學士上閱唐高祖太宗玄宗三紀得臣乃錄其行事可法者進之及屬從伐宋進言降不可殺亡不可迫二三其德者別議

詔從之俄兼諫議大夫知宣徽院事時上擊鞠無度上書諫曰臣竊觀房玄齡杜如晦隋季書生向不遇太宗安能爲一代名相臣雖不才陛下在東宮幸列侍從今又得侍聖讀未有裨補聖明陛下嘗問臣以貞觀開元之事臣請略陳之臣聞唐太宗侍太上皇宴罷則挽輦至內殿玄宗與兄弟歡飲盡家人禮陛下嗣祖考之祚躬侍太后可謂至孝臣更望定省之餘睦六親加愛敬則陛下親親之道比隆二帝矣臣又聞二帝耽玩經史數引公卿講學至于日昃故當時天下翕然嚮風以隆文治今陛下游心典籍分解章句臣願研究經理深造而篤行之二帝之治不難致矣臣又聞太宗射豕唐儉諫之玄宗臂鷹韓休言之二帝莫不樂從今陛下以毬馬爲樂愚臣思之有不宜者三故不避斧鉞言之竊以君臣同戲不免分爭君得臣愧彼負此喜一不宜躍馬揮杖縱橫馳騫不顧上下之分爭先取勝失人臣禮二不宜輕萬乘之尊圖一時之樂萬一有銜勒之失其如社稷太后何三不宜儻陛下不以臣言爲迂少賜省覽天下之福羣臣之願也書奏帝嘉歎良久未幾卒贈太子太保詔有司給葬

蕭朴字延盪國舅少父房之族父勞古以善屬文爲聖宗詩友朴幼如老成人及長博學多智開泰初補牌印郎君爲南院承旨權知轉運事尋改南面林牙帝問以政朴具陳百姓疾苦國用豐耗帝悅曰吾得人矣擢左夷离畢時蕭合卓爲樞密使朴知部署院事以酒廢事出爲興國軍節度使俄召爲南面林牙

太平三年守太子太傅明年拜北府宰相遷北院樞密使時太平日久帝留心翰墨始畫譜牒以別嫡庶由是爭訟紛起朴有吏才能知人主意敷奏稱旨朝議多取決之封蘭陵郡王進王恆加中書令及大延琳叛詔安撫東京以便宜從事興宗卽位皇太后稱制國事一委弟孝先方仁德皇后以馮家奴所誣被書朴屢言其寃不報每念至此爲之嘔血重熙初改王韓拜東京留守及遷太后于慶州朴徙王楚升南院樞密使四年王魏薨年五十贈齊王子鐸刺國舅詳穆

耶律八哥字烏古鄰五院部人幼聰慧一覽輒成誦統和中以世業爲本部吏未幾陞開撒狝尋轉樞密使侍御會宋將曹彬米信侵燕八哥以扈從有功擢上京留守開泰四年召爲北院樞密副使頃之留守東京七月上命東平王蕭排押帥師伐高麗八哥爲都監至開京大掠而還濟茶陀二河高麗追兵至諸將皆欲使敵渡兩河擊之獨八哥以爲不可曰敵若渡兩河必殊死戰乃危道也不若擊於兩河之間排押從之戰敗績明年遷東京奏渤海承奉官宜有以統領之上從其言置都知押班後以茶陀之敗削使相降西北路都監卒

論曰張儉名符帝夢遂結主知服弊袍不易志敦薄俗功著兩朝世稱賢相非過也邢抱朴甄別守令大器人望兩決滯獄民無寃濫馬得臣引盛唐之治以諫其君蕭朴痛皇后之誣至於嘔血四人者皆以明

經致位忠誠若此宜矣聖宗得人於斯為盛

乾隆四年校刊

遼史卷八十一列傳

三

遼史卷八十

遼史卷八十一

元 中 書 右 丞 相 總 裁 脫 等 修

列傳第十一

耶律室魯

歐里斯

王繼忠

蕭孝忠

陳昭衰

蕭合卓

耶律室魯字乙辛隱六院部人魁岸美容儀聖宗同年生帝愛之甫冠補祇候郎君未幾為宿直官及出師伐宋為隊帥從南府宰相耶律奴瓜統軍使蕭撻覽略地趙魏有功加檢校太師為北院大王攻拔通利軍宋和議成特進門下平章事賜推誠竭節保義功臣以本部俸羊多闕部人空乏請以羸老之羊及皮毛歲易南中絹彼此利之拜北院樞密使封韓王自韓德讓知北院職多廢曠室魯拜命之日朝野相慶從上獵松林至沙嶺卒年四十四贈守司徒政事令二子十神奴歐里斯十神奴南院大王

歐里思字留隱少有大志未冠補祇候郎君開泰初為本部司徒秩滿閑居徵為郎君班詳穩遷右皮室詳穩將本部兵從東平王蕭排押伐高麗至茶陀二河戰不利歐里斯獨全軍還帝嘉賞終西南面招討使

王繼忠不知何郡人仕宋為鄆州刺史殿前都虞候統和二十一年宋遣繼忠屯定之望都以輕騎覘我

陳昭袁小字王九雲州人工譚韃勇而善射統和中補祿候郎君爲奚拽刺詳穩累遷敦睦宮太保兼掌圍場事開泰五年秋大獵帝射虎以馬馳太速矢不及發虎怒奮勢將犯蹕左右辟易昭袁捨馬捉虎兩耳騎之虎駭且逸上命衛士追射昭袁大呼止之虎雖軼山昭袁終不墮地伺便拔佩刀殺之輦至上前慰勞良久卽日設燕悉以席上金銀器賜之特加節鉞遷圍場都太師賜國姓命張儉呂德懋賦以美之遷歸義軍節度使同知上京留守歷西南面招討都監卒

蕭合卓字合魯隱突呂不部人始爲本部吏統和初以謹恪補南院侍郎十八年北院樞密使韓德讓舉合卓爲中丞以太后遺物使宋還遷北院樞密副使開泰三年爲左夷離畢合卓久居近職明習典故嘗占對以是尤被寵渥陞北院樞密使時議以爲無完行不可大用南院樞密使王繼忠侍宴又譏其短帝頗不悅六年遣合卓伐高麗還時求進者多附之然其服食僕馬不加于舊帝知其廉以族屬女妻其子詔許親友饋獻豪貴奔趨于門太平五年有疾帝欲臨視合卓辭曰臣無狀猥蒙重仕今形容毀瘁恐陛下見而動心帝從之會北府宰相蕭朴問疾合卓執其手曰吾死君必爲樞密使慎勿舉勝已者朴出而鄙之是日卒子烏古終本部節度使

論曰統和諸臣名昭王室者多矣室魯拜樞密使朝野相慶必有得民心者繼忠旣不能死國雖通南北

之和有知人之鑑奚足尚哉孝忠昭衰皆有可稱者合卓臨終教蕭朴毋舉勝已者樞密其誤國之罪大矣

遼史卷八十一考證

王繼忠傳子懷玉仕至防禦使○

臣宗萬

按宋史繼忠子有懷節懷敏懷德懷政而此云懷玉者意宋史所載乃官其四子之名而懷玉則繼忠仕契丹所生子也

遼史卷八十一考證

元中書右丞相總裁脫脫等修

列傳第十二

耶律隆運德威制心

燕魯

耶律勃古哲

蕭陽阿

武白

蕭常哥

耶律虎古

唐魯古

耶律隆運本姓韓名德讓西南面招討使匡嗣之子也統和十九年賜名德昌二十二年賜姓耶律二十八年復賜名隆運重厚有智略明治體喜建功立事侍景宗以謹飭聞加東頭承奉官補樞密院通事轉上京皇城使遙授彰德軍節度使代其父匡嗣為上京留守權知京事甚有聲尋復代父守南京時人榮之宋兵取河東侵燕五院糺詳穩奚底統軍蕭討古等敗歸宋兵圍城招脅甚急人懷二心隆運登城日夜守禦援軍至圍解及戰高梁河宋兵敗走隆運邀擊又破之以功拜遼興軍節度使徵為南院樞密使景宗疾大漸與耶律斜軫俱受顧命立梁王為帝皇后為皇太后稱制隆運總宿衛事太后益寵任之統和元年加開府儀同三司兼政事令四年宋遣曹彬米信將十萬眾來侵隆運從太后出師敗之加守司空封楚國公師還與北府宰相室昉共執國政上言西州數被兵加以歲饑宜輕稅賦以來流民從之六年太后觀擊鞠胡里室突隆運墜馬命立斬之詔率師伐宋圍沙堆敵乘夜來襲隆運嚴軍以待敗走之

封楚王九年復言燕人挾姦苟免賦役貴族因爲囊橐可遣北院宣徽使趙智戒諭從之十一年丁母憂詔強起之明年室昉致政以隆運代爲北府宰相仍領樞密使監修國史賜興化功臣十二年六月奏三京諸鞠獄官更多因請託曲加寬貸或妄行榜掠乞行禁止上可其奏又表請任賢去邪太后喜曰進賢輔政真大臣之職優加賜賚服闋加守太保兼政事令會北院樞密使耶律斜軫薨詔隆運兼之久之拜大丞相進王齊繼二樞府事以南京平州歲不登奏免百姓農器錢及請平諸郡商賈價並從之二十二年從太后南征及河許未成而還徙王晉賜姓出宮籍隸橫帳季父房後乃改賜今名位親王上賜田宅及陪葬地從伐高麗還得久疾帝與后臨視醫藥薨年七十一贈尙書令謚文忠官給葬具建廟乾陵側無子清寧三年以魏王貼不子耶魯爲嗣天祚立以皇子敖盧斡繼之弟德威姪制心

德威性剛介善馳射保寧初歷上京皇城使儒州防禦使改北院宣徽使乾亨初丁父喪疆起復職權西南招討使統和初党項寇邊一戰却之賜劍許便宜行事領突呂不迭刺二紮軍以討平稍古葛功真授招討使夏州李繼遷叛宋內附德威請納之既得繼遷諸夷皆從璽書褒獎與惕隱耶律善補敗領將楊繼業加開府儀同三司政事門下平章事未幾以山西城邑多陷奪兵柄李繼遷受賂潛懷二心奉詔率兵往諭繼遷託以西征不出德威至靈州俘掠而還年五十五卒贈兼侍中子雋金終彰軍節度使二

孫謝十滌魯謝十終惕隱

滌魯字遵寧幼養宮中授小將軍重熙初厯北院宣徽使右林牙副點檢拜惕隱改西北路招討使封漆水郡王請減軍籍三千二百八十人後以私取回鶻使者獺毛裘及私取阻卜貢物事覺決大杖削爵免官俄起爲北院宣徽使十九年改烏古敵烈部都詳穩尋爲東北路詳穩封混同郡王清寧初徙王鄧攢拜南府宰相以年老乞骸骨更王漢太康中薨年八十滌魯神情秀徹聖宗子視之興宗待以兄禮雖貴愈謙初爲都點檢扈從獵黑嶺獲熊上因樂飲謂滌魯曰汝有求乎對曰臣富貴踰分不敢他望惟臣叔先朝優遇身歿之後不肖子坐罪籍沒四時之薦享諸孫中得赦一人以主祭臣願畢矣詔免籍復其產子燕五官至南京步軍都指揮使

制心小字可汗奴父德崇善醫視人形色輒決其病累官至武定軍節度使制心善訓鷹隼統和中爲歸化州刺史開泰中拜上京留守進漢人行宮都部署封漆水郡王以皇后外弟恩遇日隆和副使蕭合卓用事制心奏合卓寡識度無行檢上默然每內宴歡洽輒避之皇后不悅曰汝不樂耶制心對曰龍貴鮮能長保以是爲憂耳太平中厯中京留守惕隱南京留守徙王燕遷南院大王或勸制心奉佛對曰吾不知佛法惟心無私則近之矣一日沐浴更衣而臥家人聞絲竹之聲怪而入視則已逝矣年五十三贈

政事令追封陳王守上京時酒禁方嚴有捕獲私醞者一飲而盡笑而不詰卒之日部民若哀父母

耶律勃古哲字蒲奴隱六院夷离堇蒲古只之後勇悍善治生保寧中爲天德軍節度使歷南京侍衛馬步軍都指揮使以討平党項羌阿里撒米僕里鼈米遷南院大王聖宗卽位太后稱制會羣臣議軍國事勃古哲上疏陳便宜數事稱旨卽日兼領山西路諸州事統和四年宋將曹彬等侵燕勃古哲擊之甚力賜輸忠保節致主功臣總知山西五州會有告勃古哲曲法虐民者按之有狀以大杖決之八年爲南京統軍使卒子爻里官至詳稽

蕭陽阿字稍隱端毅簡嚴識遼漢字通天文相法父卒自五蕃部親挽喪車至奚王嶺人稱其孝年十九爲本班郎君歷鐵林鐵鷄大鷹三軍詳稽乾統元年由烏古敵烈部屯田太保爲易州刺史幸臣劉彥良嘗以事至州恣寵外橫爲陽阿所沮彥良歸妄加毀訾遣人代陽阿州民千餘詣闕請留卽日授武安州觀察使歷烏古涅里順義彰信等軍節度使權知東北路統軍使事聞耶律郎不鐸魯幹等叛獨引麾下三十餘人追捕之身被二創生擒十餘人送之行在坐不獲首惡免官未幾權南京留守卒

武白不知何郡人爲宋國子博士差知相州至通利軍爲我軍所俘詔授上京國子博士改臨潢縣令遷廣德軍節度副使先是有訟宰相劉慎行與子婦姚氏私者有司出其罪聖宗詔白鞫之白正其事使新

羅遵禮中京留守時慎行諸子皆處權要以白斷百姓分籍事不直坐左遷未幾遷尙書左丞知樞密事拜遼興軍節度使致仕卒

蕭常哥字胡獨董國舅之族祖約直同政事門下平章事父實老累官節度使常哥魁偉寡言年三十餘始爲祇候郎君歷本族將軍松山州刺史壽隆二年以女爲燕王妃拜永興宮使及妃生子爲南院宣徽使尋改漢人行宮都部署統和初加太子太師爲國舅詳穩二年改遼興軍節度使召爲北府宰相以柴冊禮加兼侍中天慶元年致仕卒諡曰欽肅

耶律虎古字海鄰大院夷裔董靦烈之孫少穎悟重然諾保寧初補御琰郎君十年使宋還以宋取河東之意聞于上燕王韓匡嗣曰何以知之虎古曰諸僭號之國宋皆併收惟河東未下今宋講武習戰意必在漢匡嗣力沮乃止明年宋果伐漢帝以虎古能料事器之乃曰吾與匡嗣慮不及此授涿州刺史統和初皇太后稱制召赴京師與韓德讓以事相忤德讓怒取護衛所執戎仗擊其腦卒子磨魯古

磨魯古字遙隱有智識善射統和初拜南面林牙四年宋侵燕太后親征磨魯古爲前鋒手中流矢拔而復進太后旣至磨魯古以創不能戰與北府宰相蕭繼先巡邏境上累遷北院大王七年伐宋爲先鋒與耶律奴瓜破其將李忠吉于定州以疾卒于軍

論曰德讓在統和間位兼將相其克敵制勝進賢輔國功業茂矣至賜姓名王齊晉抑有寵於太后而致然歟宗族如德威平党項滌魯完宗祀制心不苟合家聲益振豈無所自哉若勃古之忠陽阿之孝武白之直亦彬彬乎一代之良臣矣

遼史卷八十三

元 中 書 右 丞 相 總 裁 脫 脫 等 修

列傳第十三

耶律休哥 馬哥 耶律斜軫 耶律奚低 耶律學古 烏不呂

耶律休哥字遜寧祖釋魯隋國主父綰思南院夷离董休哥少有公輔器初烏古室韋二部叛休哥從北府宰相蕭幹討之應祿末爲惕隱乾亨元年宋侵燕北院大王奚底統軍使蕭討古等敗績南京被國帝命休哥代奚底將五院軍往救遇大敵于高梁河與耶律斜軫分左右翼擊敗之追殺三十餘里斬首萬餘級休哥被三創明旦宋主遁去休哥以創不能騎輕車追至涿州不及而還是年冬上命韓匡嗣耶律沙伐宋以報圍城之役休哥率本部兵從匡嗣等戰于滿城翌日將復戰宋人請降匡嗣信之休哥曰彼衆整而銳必不肯屈乃誘我耳宜嚴兵以待匡嗣不聽休哥引兵憑高而視須臾南兵大至鼓譟疾馳匡嗣倉卒不知所爲士卒棄旗鼓而走遂敗績休哥整兵進擊敵乃却詔總南面戍兵爲北院大王車駕親征圍瓦橋關宋兵來救守將張師突圍出帝親督戰休哥斬師餘衆退走入城宋陣于水南將戰帝以休哥馬介獨黃慮爲敵所識乃賜玄甲白馬易之休哥率精騎渡水擊敗之追至莫州橫屍滿道戟矢俱罄

生獲數將以獻帝悅賜御馬金盃勞之曰爾勇過于名若人人如卿何憂不克師還拜于越聖宗卽位太后稱制令休哥總南面軍務以便宜從事休哥均戍兵立更休法勸農桑修武備邊境大治統和四年宋復來侵其將范窻楊繼業出雲州曹彬米信出雄易取岐溝涿州陷固安置屯時北南院奚部兵未至休哥力寡不敢出戰夜以輕騎出兩軍間殺其單弱以脅餘衆晝則以精銳張其勢使彼勞於防禦以疲其力又設伏林莽絕其糧道曹彬等以糧運不繼退保白溝月餘復至休哥以輕兵薄之伺彼暮食擊其離伍單者出且戰且却由是南軍自救不暇結方陣塹地兩邊而行軍渴乏并漉渾而飲凡四日始達于涿聞太后軍至彬等冒雨而遁太后益以銳卒追及之彼力窮環糧車自衛休哥圍之至夜彬信以數騎亡去餘衆悉潰追至易州東聞宋師尙有數萬瀕沙河而饜促兵往擊之宋師望塵奔竄墮岸相蹂死者過半沙河爲之不流太后旋旆休哥收宋屍爲京觀封宋國王又上言可乘宋弱略地至河爲界書奏不納及太后南征休哥爲先鋒敗宋兵於望都時宋將劉廷讓以數萬騎並海而出約與李敬源合兵聲言取燕休哥聞之先以兵扼其要地會太后軍至接戰殺敬源廷讓走瀛州七年宋遣劉廷讓等乘暑潦來攻易州諸將憚之獨休哥率銳卒逆擊于沙河之北殺傷數萬獲輜重不可計獻于朝太后嘉其功詔免拜不名自是宋不敢北向時宋人欲止兒啼乃曰于越至矣休哥以燕民疲弊省賦役恤孤寡戒戍兵無犯

宋境雖馬牛逸于北者悉還之遠近向化邊鄙以安十六年薨是夕雨木冰聖宗詔立祠南京休哥智略宏遠料敵如神每戰勝讓功諸將故士卒樂爲之用身更百戰未嘗殺一無辜二子高八官至節度使高十終于越孫馬哥

馬哥字訛特懶興宗時以散職入見上問卿奉佛乎對曰臣每旦誦太祖太宗及先臣遺訓未暇奉佛帝悅清寧中遷唐古部節度使咸雍中累遷匡義軍節度使太康初致仕卒

耶律斜軫字韓隱于越曷魯之孫性明敏不事生產保寧元年樞密使蕭思溫薦斜軫有經國才上曰朕知之第佚蕩豈可羈屈對曰外雖佚蕩中未可量乃召問以時政占對剴切帝器重之妻以皇后之姪命節制西南面諸軍仍援河東改南院大王乾亨初宋再攻河東從耶律沙至白馬嶺遇敵沙等戰不利斜軫赴之令麾下萬矢齊發敵氣褫而退是年秋宋下河東乘勝襲燕北院大王耶律奚底與蕭討古逆戰敗績退屯清河北斜軫取奚底等青幟軍于得勝口以誘敵敵果爭赴斜軫出其後奮擊敗之及高粱之戰與耶律休哥分左右翼夾擊大敗宋軍統和初皇太后稱制益見委任爲北院樞密使會宋將曹彬米信出雄易楊繼業出代州太后親帥師救燕以斜軫爲山西路兵馬都統繼業陷山西諸郡各以兵守自屯代州斜軫至定安遇賀令圖軍擊破之追至五臺斬首數萬級明日至蔚州敵不敢出斜軫書帛射城

上諭以招慰意陰聞宋軍來救令都監耶律題子夜伏兵險阨俟敵至而發城守者見救至突出斜軫擊其背二軍俱潰追至飛狐斬首一萬餘級遂取蔚州賀令圍潘美復以兵來斜軫逆于飛狐擊敗之宋軍在渾源應州者皆棄城走斜軫聞繼業出兵令蕭撻凜伏兵于路明旦繼業兵至斜軫擁衆爲戰勢繼業麾幟而前斜軫佯退伏兵發斜軫進攻繼業敗走至狼牙村古軍皆潰繼業爲流矢所中被擒斜軫責曰汝與我國角勝三十餘年今日何面目相見繼業但稱死罪而已初繼業在宋以驍勇聞人號楊無敵首建梗邊之策至狼牙村心惡之欲避不可得旣擒三日死斜軫歸闕以功加守太保從太后南伐卒于軍太后親爲哀臨仍給葬具庶子狗兒官至小將軍

耶律奚低孟父楚國王之後便弓馬勇於攻戰景宗時多任以軍事統和四年爲右皮室詳穩時宋將楊繼業陷山西郡縣奚低從樞密使斜軫討之凡戰必以身先矢無虛發繼業敗于朔州之南匿深林中奚低望袍影而射繼業墮馬先是軍令須生擒繼業奚低以故不能爲功後太后南伐屢有戰績以病卒

耶律學古字乙辛隱于越洼之庶孫穎悟好學工譯鞮及詩保寧中補御蓋郎君乾亨元年宋旣下河東乘勝侵燕學古受詔往援始至京宋敗耶律奚底蕭討古等勢益張圍城三周穴地而進城中民懷二心學古以計安反側隨宜備禦晝夜不懈適有敵三百餘人夜登城學古戰却之會援軍至圍遂解學古

開門列陣四面鳴鼓居民大呼聲震天地旋有高梁之捷以功遙授保靜軍節度使爲南京馬步軍都指揮使二年伐宋乞將漢軍從之改彰國軍節度使時南境未靜民思休息學古禁寇掠以安之會宋將潘美率兵分道來侵學古以軍少虛張旗幟雜丁黃爲疑兵是夜適獨虎峪舉烽火遣人偵視見敵俘掠村野擊之悉獲所掠物擒其將領自是學古與潘美各守邊約無相侵軼民獲安業以功爲惕隱卒弟烏不呂

烏不呂字留隱嚴重有膂力善屬文統和中伐宋屢任以軍事嘗與爻直不相能因曰爾奴才何所知爻直訟于北院樞密使韓德讓德讓怒問曰爾安得此奴耶烏不呂對曰三父異籍時亦易得德讓笑而釋之後從蕭恒德伐蒲盧毛朶部以功爲東路統軍都監及德讓爲大丞相薦其材可任統軍使太后曰烏不呂嘗不遜於卿何善而薦德讓奏曰臣忝相位於臣猶不屈況於其餘以此知可用若任使之必能鎮撫諸蕃太后從之加金紫崇祿大夫檢校太尉而弟國留以罪亡烏不呂及其母俱下吏恐禍及母陰使人召國留給曰太后知事之誣汝第來勿畏國留至送有司坐誅其後退歸田里以疾卒

論曰宋乘下太原之銳以師圍燕繼遣曹彬楊繼業等分道來伐是兩役也遼亦岌岌乎殆哉休哥奮擊于高粱敵兵奔潰斜軫擒繼業于朔州旋復故地宋自是不復深入社稷固而邊境寧雖配古名將無愧

矣然非學古之在南京安其反側則二將之功蓋亦難致故曰國以人重信哉

耶律休哥傳七年宋遣劉廷讓等乘暑濟來攻易州休哥率銳卒逆擊于沙河之北殺傷數萬獲輜重不

可計○臣浩按廷讓沙河之敗宋史不載

耶律斜軫傳繼業爲流矢所中被擒斜軫責曰汝與我國角勝三十餘年今日何面目相見繼業但稱死

罪而已○臣浩按楊業秉性忠義被擒三日不食死安得有稱死罪之語至業之稱繼業以業在北漢

時原賜姓劉名繼業也

遼史卷八十三考證

元 中 書 右 丞 相 總 裁 脫 脫 等 修

列傳第十四

耶律沙

耶律抹只

蕭翰 討古

耶律善補

耶律海里

耶律沙字安隱其先嘗相遙輦氏應厯間累官南府宰相景宗卽位總領南面邊事保寧間宋攻河東沙將兵救之有功加守太保乾亨初宋復北侵沙將兵由間道至白馬嶺阻大澗遇敵沙與諸將欲待後軍至而戰冀王敵烈監軍耶律抹只等以為急擊之便沙不能奪敵烈等以先鋒渡澗未半為宋人所擊兵潰敵烈及其子蛙哥沙之子德里令穩都敏詳穩唐筭等五將俱沒會北院大王耶律斜軫兵至萬矢俱發敵軍始退沙將趨太原會漢駙馬都尉盧俊來奔言太原已陷遂勒兵還宋乘銳侵燕沙與戰于高粱河稍却遇耶律休哥及斜軫等邀擊敗宋軍宋主宵遁至涿州微服乘驢車間道而走上以功釋前過是年復從韓匡嗣伐敗宋續帝欲誅之以皇后營救得免睿智皇后稱制召賜几杖以優其老復從伐宋敗劉廷讓李敬源之軍賜資優渥統和六年卒

耶律抹只字留隱仲父隋國王之後初以皇族入侍景宗卽位為林牙以幹給稱保寧間遷樞密副使宋

攻河東南府宰相耶律沙爲都統將兵往援抹只監其軍及白馬嶺之敗僅以身免宋乘銳攻燕將奚兵
翌休哥擊敗之上以功釋前過十一年從都統韓匡嗣伐宋戰于滿城爲宋將所給諸軍奔潰獨抹只部
伍不亂徐整旗鼓而歸璽書褒諭改南海軍節度使乾亨二年拜樞密副使統和初爲東京留守宋將曹
彬米信等侵邊抹只引兵至南京先繕守禦備及車駕臨幸抹只與耶律休哥逆戰于涿之東克之遷開
遼軍節度使故事州民歲輸稅斗粟折錢五抹只表請折錢六部民便之統和末卒

蕭幹小字項烈字婆典北府宰相敵魯之子性質直初察割之亂其黨胡古只與幹善使人召之幹曰吾
豈能從逆臣縛其人送壽安王賊平上嘉其忠拜羣牧都林牙復以伐烏古功遷北府宰相改突呂不部
節度使乾亨初宋伐河東乘勝侵燕詔幹拒之戰于高梁河耶律沙退走幹與耶律休哥等併力戰敗之
上手勅慰勞自是每征伐必參決軍事加政事令二年宋兵圍瓦橋夜襲我營幹及耶律勻骨戰却之時
皇后以父呼幹及后爲皇太后稱制幹數條奏便宜多見聽用統和四年卒姪討古

討古字括寧性忠簡應祿初始入侍會冀王敵烈宣徽使海思謀反討古與耶律阿烈密告於上上嘉其
忠詔尙朴謹公主保寧末爲南京統軍使乾亨初宋侵燕討古與北院大王奚底拒之不克軍潰討古等
不敢復戰退屯清河帝聞其敗遣使責之曰卿等不嚴偵候用兵無法遇敵卽敗奚以將爲討古懼頓之

援兵至討古奮力以敗宋軍上釋其罪降爲南京侍衛親軍都指揮使四年卒

耶律善補字瑤昇孟父楚國王之後純謹有才智景宗卽位授千牛衛大將軍遷大同軍節度使及伐宋韓匡嗣與耶律沙將兵由東路進善補以南京統軍使由西路進善補聞匡嗣失利斂兵還乾亨末與宋軍戰于滿城爲伏兵所圍斜軫救之獲免以失備大杖決之統和初爲惕隱會宋來侵善補爲都元帥逆之不敢戰故嶺西州郡多陷罷惕隱以其叔安端有匡輔世宗功土愍之徵善補爲南府宰相遷南院大王會再舉伐宋欲攻魏府召衆集議將士以魏城無備皆言可攻善補曰攻因易然城大巨量若克其城士卒貪俘掠勢必不可遏且傍多巨鎮各出援兵內有重敵何以當之上乃止善補性懦守靜凡征討憚攻戰急還以故戰多不利年七十四卒

耶律海里字留隱令穩援里得之長子察割之亂其母的魯與焉遣人召海里海里拒之亂平的魯以子故獲免海里儉素不喜聲利以射獵自娛雖居閑人敬之若貴官然保寧初拜彰國軍節度使遷惕隱秩滿稱疾不仕久之復爲南院大王及曹彬米信等來侵海里有却敵功賜資忠保義匡國功臣帝屢親征海里在南院十餘年鎮以寬靜戶口增給時議重之封漆水郡王遷上京留守薨詔以家貧給葬具

論曰當高梁朔州之捷偏裨之將如沙與抹只旣因休哥斜軫類見其功所謂失之東隅收之桑榆若蕭

幹海里担察割之招討古告海思之變則不止有戰功而已其視善補畏懦豈不優哉

遼史卷八十五

元 中 書 右 丞 相 總 裁 脫 脫 等 修

列傳第十五

蕭撻凜 蕭觀音奴 耶律題子 耶律諧理 耶律奴瓜 蕭柳

高 勳 奚和朔奴 蕭塔烈葛 耶律撒合

蕭撻凜字馳盜思温之再從姪父朮魯列善相馬應麻間為馬群侍中撻凜幼敦厚有才略通天文保寧初為宿直官累任驛劇統和四年宋楊繼業率兵由代州來侵攻陷城邑撻凜以諸軍副部署從樞密使耶律斜軫敗之擒繼業于朔州六年秋改南院都監從駕南征攻沙堆力戰被創太后嘗親臨視明年加右監門衛上將軍檢校太師遙授彰德軍節度使十一年與東京留守蕭恆德伐高麗破之高麗稱臣奉貢十二年夏人梗邊皇太妃受命總烏古及永興宮分軍討之撻凜為阻卜都詳穩凡軍中號令太妃並委撻凜師還以功加兼侍中封蘭陵郡王十五年敵烈部人殺詳穩而叛遁于西北荒撻凜將輕騎逐之因討阻卜之未服者諸蕃歲貢方物充于國自後往來若一家為上賜詩嘉獎仍命林牙耶律昭作賦以述其功撻凜以諸部叛服不常上表乞建三城以絕邊患從之俄召為南京統軍使二十年復伐宋擒其

將王先知破其軍于遂城下祁州上手詔獎諭進至澶淵宋主軍於城隍間未接戰撻凜按視地形取宋之羊觀鹽堆鳧鴈中伏弩卒明日轉車至太后哭之慟輟朝五日子慥古南京統軍使

蕭觀音奴字耶靈奚王搭紇之孫統和十二年爲右祇候郎君班詳穩遷奚大部大王先是俸秩外給獐鹿百數皆取於民觀音奴奏罷之及伐宋與蕭撻凜爲先鋒降祁州下德清軍上加優賞同知南院事卒耶律題子字勝隱北府宰相兀里之孫善射工畫保寧間爲御盞郎君九年奉使于漢具言兩國通好長久之計其主繼元深加禮重統和二年將兵與西邊詳穩耶律速撒討陀羅斤大破之四年宋將楊繼業陷山西城邑題子從北院樞密使耶律斜軫擊之敗賀令圖於定安授西南面招討都監宋兵守蔚州急召外援題子聞之夜伏兵道傍黎明宋兵果來過未半而擊之城中軍出斜軫復邀之兩軍俱潰奔飛狐地隘不得進殺傷甚衆賀令圖復集敗卒來襲蔚州題子逆戰破之應州守將自遁進圍寰州冒矢石登城宋軍大潰當斜軫擒繼業于朔州題子功居多是年冬復與蕭撻凜由東路擊宋俘獲甚衆後聞宋兵屯易州率兵逆之至易境而卒初題子破令圖宋將有因傷而仆題子繪其狀以示宋人咸嗟神妙

耶律諧理字烏古鄰突舉部人統和五年宋將楊繼業來攻山西諧理從耶律斜軫擊之常居先鋒偵候有功是歲伐宋宋人拒於溇沱河諧理率精騎便道先濟獲其將康保威以功詔世預節度使選太平元

年稍遷本部節度使六年從蕭惠攻甘州不克會阻卜攻圍三剋軍諧理與都監耶律涅魯古往救至可敦城西南遇敵不能陣中流矢卒

耶律奴瓜字延寧太祖異母弟南府宰相蘇之孫有膂力善調鷹隼統和四年宋楊繼業來侵奴瓜爲黃皮室紮都監擊敗之盡復所陷城邑軍還加諸衛小將軍及伐宋有功遷黃皮室詳穩六年再舉將先鋒軍敗宋游兵于定州爲東京統軍使加金紫崇祿大夫從奚王和朔奴伐兀惹以戰失利削金紫崇祿階十九年拜南府宰相二十一年復伐宋擒其將王繼忠于望都俘殺甚衆以功加同政事門下平章事二十六年爲遼興軍節度使尋復爲南府宰相開泰初加尙父卒

蕭柳字徒門瀆欽皇后弟阿古只五世孫幼養于伯父排押之家多知能文膂力絕人統和中叔父恆德臨終薦其才詔入侍衛十七年南伐宋將范庭召列方陣而待時皇弟隆慶爲先鋒問諸將佐誰敢當者柳曰若得駿馬則願爲之先隆慶授以甲騎柳攬轡謂諸將曰陣若動諸君急攻遂馳而前敵少却隆慶席勢攻之南軍遂亂中流矢裹創而戰衆皆披靡時排押留守東京奏柳爲四軍兵馬都指揮使明年爲北女直詳穩政濟寬猛部民畏愛遷東路統軍使秩滿百姓願留復任許之從伐高麗遇大蛇當路前驅者請避柳曰壯士安懼此拔劍斷蛇師還致仕柳好滑稽雖君臣燕飲詼諧無所忌時人比之俳優臨終

謂人曰吾少有致君志不能直遂故以諧進冀萬有一補俳優名何避頃之被寢衣而坐呼曰吾去矣言訖而逝耶律觀音奴集柳所著詩千篇目曰歲寒集

高勳字鼎臣晉北平王信輅之子性通敏仕晉爲閤門使會同九年與杜重威來降太宗入汴授四方館使好結權貴能服勤大臣多推譽之天祿間爲樞密使總漢軍事五年劉崇遣使來求封冊詔勳冊崇爲大漢神武皇帝應祿初封趙王出爲上京留守尋移南京會宋欲城益津勳上書請假巡徼以擾之帝然其奏宋遂不果城十七年宋略地益津關勳擊敗之知南院樞密事景宗卽位以定策功進王秦保寧中以南京郊內多隙地請疏畦種稻帝欲從之林牙耶律昆宣言於朝曰高勳此奏必有異志果令種稻以水爲畦設以京叛官軍何自而入帝疑之不納尋遷南院樞密使以毒藥餽駙馬都尉蕭噶里事覺流銅州尋又謀害尙書令蕭思溫詔獄誅之沒其產皆賜思溫家

奚和朔奴字籌寧奚可汗之裔保寧中爲奚六部長統和初皇太后稱制以耶律休哥領南邊事和朔奴爲南面行軍副部署四年宋曹彬米信等來侵和朔奴與休哥破宋兵于燕南手詔褒美軍還怙權搆無罪人李浩至死上以其功釋之冬南征將本部軍由別道進擊敵軍於狼山俘獲甚衆八年上表曰臣竊見太宗之時奚六部二宰相二常袞誥命大常袞班在會長左右副常袞總知會長五房族屬二宰相匡

輔會長建明善事今宰相職如故二常衰別無所掌乞依舊制從之十三年秋遷都部署伐兀惹駐于鐵
驪林馬數月進至兀惹城利其俘掠請降不許令急攻之城中大恐皆殊死戰和朔奴知不能克從副部
署蕭恆德讓掠地東南循高麗北界而還以地遠糧絕士馬死傷詔降封爵卒子烏也郎君班詳縉
蕭塔列葛字雄隱五院部人八世祖只魯遙輩氏時嘗爲虞人唐安祿山來攻只魯戰于黑山之陽敗之
以功爲北府宰相世預其選塔列葛仕開泰間累遷西南面招討使重熙十一年使西夏諭伐宋事約元
昊出別道以會十二年改右夷離畢同知南京留守轉左夷離畢俄授東京留守以世選爲北府宰相卒
耶律撒合字牽懶乙室部人南府宰相歐禮斯子天祿間始仕應祿中拜乙室大王兼知兵馬事乾亨初
宋來侵詔以本部兵守南京與北院大王奚底統軍蕭討古等逆戰奚底等敗走獨撒合全軍還上諭之
曰拒敵當如此卿勉之無愛不富貴加守太保統和間卒

論曰遼在統和間數舉兵伐宋諸將如耶律諧理奴瓜蕭柳等俱有降城擒將之功最後以蕭撻凜爲統
軍直抵澶淵將與宋戰撻凜中弩我兵失倚和議始定或者天厭其亂使南北之民休息者耶

遼史卷八十五

遼史卷八十六

元 中 書 右 丞 相 總 裁 脫 脫 等 修

列傳第十六

耶律合住

劉景

劉六符

耶律裏腹

牛温舒

杜防

蕭和尙 特末

耶律合理只

耶律頗的

耶律合住字粘衮太祖弟迭刺之孫幼不好弄臨事明敏善談論初以近族入侍每從征伐有功保靈初加右龍虎衛上將軍以宋師屢梗南邊拜涿州刺史西南兵馬都監招安巡檢等使賜推忠奉國功臣合住久任邊防雖有克獲功然務鎮靜不妄生事以邀近功鄰壤敬畏屬部又安宋數遣人結歡冀達和意合住表聞其事帝許議和安邊懷敵多有力焉拜左金吾衛上將軍秩滿遙攝鎮國軍節度使卒合住智而有文曉暢戎政鎮范陽時嘗領數騎徑詣雄州北門與郡將立馬陳兩國利害及周師侵邊本末辭氣慷慨左右壯之自是邊境數年無事識者以謂合住一言賢於數十萬兵

劉景字可大河間人四世祖怛即木滔之甥唐右僕射盧龍軍節度使父守敬南京副留守景資端厚好學能文燕王趙延壽辟為幽都府文學應麻初遷右拾遺知制誥為翰林學士九年周人侵燕留守蕭思

溫上急變帝欲俟秋出師景諫曰河北三關已陷于敵今復侵燕安可坐視上不聽會父憂去未幾起復舊職一日召草赦既成留數月不出景奏曰唐制赦書日行五百里今稽期弗發非也上亦不報景宗卽位以景忠實擢禮部侍郎遷尙書宣政殿學士上方欲倚用乃書其笏曰劉景可爲宰相頃之爲南京副留守時留守韓匡嗣因扈從北上景與其子德讓共理京事俄召爲戶部使歷武定開遠二軍節度使統和六年致仕加兼侍中卒年六十七贈太子太師子慎行孫一德二玄三緞四端五常六符皆具六符傳劉六符父慎行由膳部員外郎累遷至北府宰相監修國史時上多卽宴飲行誅賞慎行諫曰以喜怒加威福恐未當帝悟諭政府自今宴飲有刑賞事翌日稟行爲都統伐高麗以失軍期下吏議貴乃免出爲彰武軍節度使賜保節功臣子六人一德二玄五緞四端五常六符德早世玄終上京留守常歷三司使武定軍節度使緞端符皆第進士緞端俱尙主爲駙馬都尉三緞獻聖宗一矢斃雙鹿賦上嘉其贍麗與公主不諧奔宋歸殺之四端以衛尉少卿使宋賀生辰方宴大張女樂竟席不顧人憚其嚴還拜樞密直學士六符有志操能文重熙初遷政事舍人擢翰林學士十一年與宣徽使蕭特末使宋索十縣地還爲漢人行宮副部署會宋遣使增歲幣以易十縣復與耶律仁先使宋定進貢名宋難之六符曰本朝兵彊將勇海內共知人人願從事于宋若恣其俘獲以飽所欲與進貢字孰多况大兵駐燕萬一南進何以禦

之顧小節忘大患悔將何及宋乃從之歲幣稱貢六符還加同中書門下平章事及宋幣至命六符爲三司使以受之六符與參知政事杜防有隙防以六符嘗受宋賂白其事出爲長寧軍節度使俄召爲三司使道宗卽位將行大冊禮北院樞密使蕭革曰行大禮備儀物必擇廣地莫若黃川六符曰不然禮儀國之大體帝王之樂不奏于野今中京四方之極朝覲各得其所宜中京行之上從其議尋以疾卒

耶律裏履字海鄰大院夷窩董蒲古只之後風神爽秀工于畫重熙間累遷同知點檢司事駙馬都尉蕭胡覲爲夏人所執奉詔索之三返以歸轉永興宮使右祇候郎君班詳穩裏履將娶秦晉長公主孫其母與公主婢有隙謂裏履曰能去婢乃許爾婚裏履以計殺之婚成事覺有司以大辟論裏履善畫寫聖宗真以獻得減坐長流邊戍復以寫真召拜同知南院宣徽事使宋賀正寫宋主容以歸清寧間復使宋宋主賜宴瓶花隔面未得其真陛辭僅一視及境以像示餞者駭其神妙聞重元亂不卽勤王賊平入賀帝責讓之宴酣顧裏履曰重元事成卿必得爲上客裏履大慙咸雍中加太子太師卒

牛溫舒范陰人剛正尙節義有遠器咸雍中擢進士第滯小官大安初累遷戶部使轉給事中知三司使事國民兼足上以爲能加戶部侍郎改三同使壽隆中拜參知政事兼同知樞密院事攝中京留守部民詣闕請真拜從之召爲三司使乾統初復參知政事知南院樞密使事五年夏爲宋所攻來請和解溫舒

與蕭得里底使宋方大燕優人爲道士裝索土泥藥爐優曰土少不能和溫舒遽起以手籍土懷之宋主問其故溫舒對曰臣奉天子威命來和若不從則當卷土收去宋人大驚遂許夏和還加中書令卒

杜防涿州歸義縣人開泰五年擢進士甲科累遷起居郎知制誥人以爲有宰相器太平中遷政事舍人拜樞密副使重熙九年夏人侵宋遣郭禎來告請與夏和上命防使夏解之如約罷兵各歸侵地拜參知政事韓紹芳劉六符忌之防待以誠十二年紹芳等罷愈見信任十二年拜南府宰相防生子帝幸其第賜名王門奴以進奏有誤出爲武定軍節度使十四年復召爲南府宰相二十一年秋祭仁德皇后詔儒臣賦詩防爲冠賜金帶道宗諒陰爲大行皇帝山陵使清寧二年前上諭防曰朕以卿年老嗜酒不欲煩以劇務朝廷之事總綱而已頃之拜右丞相加尙父卒上歎悼不已贈贈加等官給葬具贈中書令諡曰元肅子公謂終南府宰相

蕭和尙字洪寧國舅大父房之後忠直多志略開泰初補玉蓋郎君尋爲內史太醫等局都林牙使宋賀正將宴典儀者告班節度使下和尙曰班次如此是不以大國之使相禮且以錦服爲貺如待蕃部若果如是吾不預宴宋臣不能對易以紫服位視執政使禮始定八年秋爲唐古部節度使卒弟特末

特末字何靈爲人機辨任氣太平中累遷安東軍節度使有能稱十一年召爲左祇候郎君班詳穩未幾

遷左夷離畢重熙十年累遷北院宣徽使劉六符使宋索十縣故地宋請增銀絹十萬兩足以易之歸稱旨加同政事門下平章詔城西南渾底甸還復爲北院宣徽使卒

耶律合里只字特滿六院夷離蒐蒲古只之後重熙中累遷西南面招討都監充宋國生辰使饋于白溝驛宋宴勞優者嘲蕭惠河西之敗合里只曰勝負兵家常事我嗣聖皇帝俘石重貴至今興中有石家寨惠之一敗何足較哉宋人慚服帝聞之曰優伶失辭何可傷兩國交好鞭二百免官清寧初起爲懷化軍節度使七年入爲北院大王封幽國公歷遼興軍節度使東北路詳穩加兼侍中致仕卒合里只明達勤恪懷柔有道置諸賓館及西邊營田皆自合里只發之

耶律頗的字撒版季父房奴瓜之孫孤介寡合重熙初補牌印郎君清寧初稍遷知易州去官部民請留許之咸雍八年改彰國軍節度使上獵大牢古山頗的謁于行宮帝問邊事對曰自應州南境至天池皆我耕牧之地清寧間邊將不謹爲宋所侵烽堠內移似非所宜道宗然之拜北面林牙後遣人使宋得其使地命頗的往定疆界還拜南院宣徽使太康四年遷忠順軍節度使尋爲南院大王改同知南京留守事召拜南府宰相賜貞良功臣封吳國公爲北院樞密使廉謹奉公知無不爲大安中致仕卒子霞抹北

院樞密副使

乾隆四年校刊

遼史卷八十六列傳

三

論曰耶律合住安邊講好養兵息民其慮深遠矣六符啟讐邀功豈國家之利哉牛杜頗的合里只輩銜命出使幸不辱命褻履殺人婢以求婚身負罪戮畫其主容以冀免死亦可醜也

遼史卷八十七

元 中 書 右 丞 相 總 裁 脫 脫 等 修

列傳第十七

蕭孝穆

撒八 孝友

孝先

蕭蒲奴

耶律蒲古

夏行美

蕭孝穆小字胡獨董瀆欽皇后弟阿古只五世孫父陶瑰為國舅詳穩孝穆廉謹有禮法統和二十八年累遷西北路招討都監開泰元年遙授建雄軍節度使加檢校太保是年尤烈等變孝穆擊走之冬進軍可敦城阻卜結五羣牧長查刺阿覩等謀中外相應孝穆悉誅之迺嚴備禦以待餘黨遂潰以功遷九水諸部安撫使尋拜北府宰相賜忠穆熙霸功臣檢校太師同政事門下平章事八年還京師太平二年知樞密院事充漢人行宮都部署三年封燕王南京留守兵馬都總管九年大延琳以東京叛孝穆為都統討之戰于蒲水中軍稍却副部署蕭匹敵都監蕭蒲奴以兩翼夾擊賊潰追敗之于手山北延琳走入城深溝自衛孝穆圍之築重城起樓櫓使內外不相通城中撤屋以爨其將楊詳世等擒延琳以降遼東悉平改東京留守賜佐國功臣為政務寬簡撫納流徙其民安之興宗即位徙王秦尋復為南京留守重熙六年進封吳國王拜北院樞密使八年表請籍天下戶口以均徭役又陳諸部及舍利軍利害從之由是

政賦稍平衆悅九年徙王楚時天下無事戶口蕃息上富于春秋每言及周取十縣慨然有南伐之志羣臣多順旨孝穆諫曰昔太祖南伐終以無功嗣聖皇帝卜唐立晉後以重責叛長驅入汴鑾馭始旋反來侵軼自後連兵二十餘年僅得和好蒸民樂業南北相通今國家比之曩日雖曰富彊然勳臣宿將往往物故且宋人無罪陛下不宜棄先帝盟約時上意已決書奏不報以年老乞骸骨不許十一年復爲北院樞密使更王齊薨追贈大丞相晉國王諡曰貞孝穆雖椒房親位高益畏太后有賜輒辭不受妻子無驕色與人交始終如一所薦拔皆忠直士嘗語人曰樞密選賢而用何事不濟若自親煩碎則大事凝滯矣自蕭合卓以吏才進其後轉効不知大體歎曰不能移風易俗偷安爵位臣子之道若是乎時稱爲國寶臣目所著文曰寶老集二子阿刺撒八弟孝先孝忠孝友各有傳

撒八字周隱七歲以戚屬加左右千牛衛大將軍重熙初補祇候郎君性廉介風姿爽朗善馳馬馳射帝每燕飲喜諧謔撒八雖承寵顧常以禮自持時人稱之以柴册禮恩加檢校太傅承興宮使總領左右護衛同知點檢司事尙魏國公主拜駙馬都尉爲北院宣徽使仍總知朝廷禮儀重熙末出爲西北路招討使武寧郡王居官以治稱清寧初薨年三十九追封齊王

孝先字延寧小字海里統和十八年補祇候郎君尙南陽公主拜駙馬都尉開泰五年爲國舅詳穩將兵

城東鄙還爲南京統軍使太平二年爲漢人行宮都部署尋加太子太傅五年遷上京留守以母老求侍復爲國舅詳穩改東京留守會大延琳反被圍數月穴地而出延琳平留守上京十一年帝不豫欽哀召孝先總禁衛事興宗諒陰哀弒仁德皇后孝先與蕭泥卜蕭匹敵等謀居多及欽哀攝政遙授天平軍節度使加守司徒兼政事令重熙初封楚王爲北院樞密使孝先以椒房親爲太后所重在樞府好惡自恣權傾人主朝多側目二年太后與孝先謀廢立事帝知之勒衛兵出宮召孝先至諭以廢太后意孝先震懼不能對遷太后于慶州孝先恆鬱鬱不樂四年徙王晉後爲南京留守卒諡忠肅

孝友字撻不衍小字陳留開泰初以戚屬爲小將軍太平元年以大冊加左武衛大將軍檢校太保賜名孝友重熙元年累遷西北路招討使封蘭陵郡王八年進王陳先是蕭惠爲招討使專以威制西羌諸夷多叛孝友下車厚加綏撫每入貢輒增其賜物羌人以安久之寢成姑息諸夷桀驁之風遂熾議者譏其過中十年加政事令賜劾節宣庸定遠功臣更王吳後以葬兄孝穆孝忠還京師拜南院樞密使加賜翊聖協穆保義功臣進王趙拜中書令丁母憂起復北府宰相出知東京留守會伐夏孝友與樞密使蕭惠失利河南帝欲誅之太后救免復爲東京留守徙王燕改上京留守更王秦清寧初加尙父頃之復留守東京明年復爲北府宰相帝親製誥詞以褒寵之以柴冊恩遙授洛京留守益賜純德功臣致仕進封豐

國王坐子胡覩首與重元亂伏誅年七十三胡覩在逆臣傳

蕭蒲奴字留隱奚王楚不寧之後幼孤貧傭于醫家牧牛傷人稼數遭笞辱醫者嘗見蒲奴熟寐有蛇遶身異之教以讀書聰敏嗜學不數年涉獵經史習騎射旣冠意氣豪邁開泰間選充護衛稍進用俄坐罪黥流烏古部久之召還累任劇遷奚六部大王治有聲太平九年大延琳據東京叛蒲奴爲都監將右翼軍遇賊戰蒲水中軍少却蒲奴與左翼軍夾攻之先據高麗女直要衝使不得求援又敗賊于手山延琳走入城蒲奴不介馬而馳追殺餘賊已而大軍圍東京蒲奴討諸叛邑平吼山賊延琳堅守不敢出旣被擒蒲奴以功加兼侍中重熙六年改北阻卜副部署再授奚六部大王十五年爲西南面招討使西征夏國蒲奴以兵二千據河橋聚巨艦數十艘仍作大鉤人莫測戰之日布舟于河綿亘三十餘里遣人伺上流有浮物輒取之大軍旣失利蒲奴未知適有大水順流而下勢將壞浮梁斷歸路操舟者爭鉤致之橋得不壞明年復西征懸兵深入大掠而還復爲奚六部大王致仕卒

耶律蒲古字提隱太祖弟蘇之四世孫以武勇稱統和初爲涿州刺史從伐高麗有功開泰末爲上京內客省副使太平二年城鴨綠江蒲古守之在鎮有治績五年改廣德軍節度使尋遷東京統軍使莅政嚴肅諸部懾服九年大延琳叛以書結保州夏行美執其人送蒲古蒲古人據保州延琳氣沮以功拜惕隱

十一年爲子鐵驪所弑

夏行美渤海人太平九年大延琳叛時行美總渤海軍于保州延琳使人說欲與俱叛行美執送統軍耶律蒲古又誘賊黨百人殺之延琳謀沮迺嬰城自守數月而破以功加同政事門下平章事錫賚甚厚明年擢忠順軍節度使重熙十七年遷副部署從點檢耶律義先討蒲奴里獲其酋陶得里以歸致仕卒上思其功遣使祭于家

論曰不有君子其能國乎方其擒延琳定遼東一時諸將之功偉矣宜其撫劍抵掌賈餘勇以威天下也蕭孝穆之諫南侵其意防何其弘遠歟是豈臆句語難者所能知哉至論移風俗爲治之本親煩碎爲失大臣體又何其深切著明也爲國寶臣宜矣孝先預弑仁德之謀猶依城社以逃熏灌爲國巨蠹雖功何議焉

遼史卷八十七

遼史卷八十八

元中書右丞相總裁脫脫等修

列傳第十八

蕭敵烈拔刺耶律盆奴

蕭排押恆德

匹敵

耶律資忠

耶律瑤質

耶律弘古

高正 耶律的琰 大康父

蕭敵烈字涅魯衰宰相撻烈四世孫識度弘遠為鄉里推重始為牛羣敵史帝聞其賢召入侍遷國舅詳
總統和二十八年帝謂羣臣曰高麗康肇弑其君誦立誦族兄詢而相之大逆也宜發兵問其罪羣臣皆
曰可敵烈諫曰國家連年征討士卒抗傲况陛下在諒陰年穀不登創痍未復島夷小國城壘完固勝不
為武萬一失利恐貽後悔不如遣一介之使往問其故彼若伏罪則已不然俟服除歲豐舉兵未晚時令
已下言雖不行識者諱之明年同知左夷離畢事改右夷離畢開泰初率兵巡西邊時夷離董部下闖撒
狻撲里失室勃葛率部民遁敵烈追擒之令復業遷國舅詳穩從樞密使耶律世良伐高麗還加同政事
門下平章事拜上京留守敵烈為人寬厚達政體廷臣皆謂有王佐才漢人行宮都部署王繼忠薦其材
可為樞密使帝疑其黨而止為中京留守卒族子忽古有傳弟拔刺

拔刺字別勒隱多智善騎射開泰間以兄爲右夷离畢始補郎君累遷奚六部禿里太尉太平末大延琳叛拔刺將北南院兵往討過于蒲水南院兵少却至手山復與賊遇拔刺乃易兩院旗幟鼓勇力戰破之上聞以手詔褒獎賜內廐馬重熙中遷四捷軍詳穩謝事歸鄉里數歲起爲昭德軍節度使尋改國舅詳穩卒

耶律盆奴字胡獨董惕隱涅魯古之孫景宗時爲烏古部詳穩政尙嚴急民苦之有司以聞詔曰盆奴任方面寄以細故究問恐損威望尋遷馬羣太保統和十六年隱實燕軍之不任事者汰之二十八年駕征高麗盆奴爲先鋒至銅州高麗將康肇分兵爲三以抗我軍一營于州西據三水之會肇居其中一營近州之山一附城而營盆奴率耶律弘古擊破三水營擒肇李玄蘊等軍望風潰會大軍至斬三萬餘級追至開京破敵於西嶺高麗王詢聞邊城不守遁去盆奴入開京焚其王宮迺撫慰其民人上嘉其功遷北院大王薨

蕭排押字韓隱國舅少父房之後多智略能騎射統和初爲左皮室詳穩討阻卜有功四年破宋將曹彬米信兵于望都凡軍事有疑每預參決尋總永興宮分紮及舍利拽刺二皮室等軍與樞密使耶律斜軫收復山西所陷城邑是冬攻宋隸先鋒圍蒲城率所部先登拔之改南京統軍使尙衛國公主拜駙馬都

尉加同政事門下平章事十三年歷北南院宣徽使條上時政得失及賦役法上嘉納焉十五年加政事令遷東京留守二十二年復攻宋將渤海軍下德清軍後蕭撻孛卒專任南面事宋和議成爲北府宰相聖宗征高麗將兵由北道進至開京西嶺破敵軍斬數千級高麗王詢懼奔平州排押入開京大掠而還帝嘉之封蘭陵郡王開泰二年以宰相知西南面招討使五年進王東平排押爲政寬裕而善斷諸部長愛民以殷富時議多之七年再伐高麗至開京敵奔潰縱兵俘掠而還渡茶陀二河敵夾射排押委甲仗走坐是免官太平三年復王幽薨弟恆德

恆德字遜寧有膽略而善謀統和元年尙越國公主拜駙馬都尉遷南面林牙從宣徽使耶律阿沒里征高麗還改北面林牙會宋將曹彬米信侵燕耶律休哥與恆德議軍事多見信用爲東京留守六年上攻宋圍沙堆恆德獨當一面城上矢石如雨恆德意氣自若督將士奪其陴城陷中流矢太后親臨視賜藥攻長城口復先登太后益多其功時高麗未附恆德受詔率兵拔其邊城王始懼上表請降十二年八月賜敗聖竭力功臣從都部署和朔奴討兀惹未戰兀惹請降恆德利其俘獲不許兀惹死戰城不能拔和朔奴議欲引退恆德曰以彼倔彊吾奉詔來討無功而還諸部謂我何若深入多獲猶勝徒返和朔奴不得已進擊東南諸部至高麗北鄙比還道遠糧絕士馬死傷甚衆坐是削功臣號十四年爲行軍都部署

伐補盧毛柔部還公主疾太后遣宮人賢釋侍之恆德私焉公主恚而薨太后怒賜死後追封蘭陵郡王
子匹敵

匹敵字蘇隱一名昌裔生末月父母俱死育于禁掖既長尙秦晉王公主拜駙馬都尉爲殿前副點檢統
和八年改北面林牙太平四年遷殿前都點檢出爲國舅詳穩九年渤海大延琳叛劫掠隣部與南京留
守蕭孝穆往討孝穆欲全城降乃築重城圍之數月城中人陰來納款遂擒延琳東京平以功封蘭陵郡
王十一年聖宗不豫先是欽哀與仁德皇后有隙以匹敵嘗爲后所愛忌之時護衛馮家奴上變誣弟泥
卜與匹敵謀逆以皇后攝政徐議當立者公主竊聞其謀謂匹敵曰爾將無罪被戮與其死何若奔女直
國以全其生匹敵曰朝廷詎肯以飛語害忠良寧死弗適他國及欽哀攝政殺之

耶律資忠字沃衍小字札刺系出仲父房兄國留善屬文聖宗重之時妻弟之妻阿古與奴通將奔女直
國國留追及奴殺之阿古自經阿古母有寵于太后事聞太后怒將殺之帝度不能救遣人訣別問以後
事國留謝曰陛下憫臣無辜恩漏九泉死且不朽旣死人多寃之在獄著兔賦寤寐歌爲世所稱資忠博
學工辭章年四十未仕聖宗知其賢召補宿衛數問以古今治亂資忠對無隱開泰中授中丞眷遇日隆
初高麗內屬取女直六部地以賜至是貢獻不時至詔資忠往問故高麗無歸地意由是權貴數短於上

出爲上京副留守四年再使高麗留弗遣資忠每懷君親輒有著述號西亭集帝與羣臣宴時一記憶曰資忠亦有此樂乎九年高麗上表謝罪始送資忠還帝郊迎同載以歸命大臣宴勞留禁中數日謂曰朕將屈卿爲樞密何如資忠對曰臣不才不敢奉詔乃以爲林牙知惕隱事初資忠在高麗也弟昭爲著帳郎君坐罪沒家產至是乃復橫帳且還舊產詔以外戚女妻之是時樞密使蕭合卓少師蕭把哥有寵資忠不肯俛附詆之帝怒奪官數歲出知來遠城事歷保定昭德二軍節度使聖宗崩表請會葬旣至伏梓宮大慟曰臣幸遇聖明橫被構譖不獲盡犬馬報氣絕而蘇興宗命醫治疾久之言國舅侍中無憂國心陛下不當復用唐景福舊號於是用事者惡之遺歸鎮卒弟昭有傳

耶律瑤質字拔里董積慶宮人父候古室韋部節度使瑤質篤學廉介有經世志統和十年累遷至積慶宮使聖宗嘗諭瑤質曰聞卿正直是以進用國有利害爾言宜無所隱由是所陳多見嘉納上征高麗破康肇軍于銅州瑤質之力爲多王詢乞降羣臣議皆謂宜納瑤質曰王詢始一戰而敗遽求納欵此詐耳納之恐墮其姦計待其勢窮力屈納之未晚已而詢果遁清野無所獲其衆阻險而壘攻之不下瑤質以計降之擢拜四蕃部詳穩時招討使耶律頗的爲總管瑤質耻居其下上表曰臣先朝舊臣今旣垂老乞還新命覬得常侍左右帝曰朕不使汝久處是任且命無隸招討得專奏事到部戢暴懷善政績顯著卒

于官

耶律弘古字盆納隱遙輦鮮質可汗之後統和初嘗以軍事任爲拽刺詳穩尋徙南京統軍使十三年狗地南鄙克敵於四岳橋斬首百餘級攻宋以戰功遷東京留守封楚國公後伐高麗副先鋒耶律盆奴擒康肇于銅州三十年西北部叛從南府宰相耶律奴瓜討之及典禁軍號令整肅諸部多降尋遷侍中卒高正不知何郡人統和初舉進士第累遷樞密直學士上將伐高麗遣正先往諭意及還遷右僕射時高麗王詢表請入覲上許之遣正率騎兵千人迓之館于路爲高麗將卓思正所圍正以勢不可敵與麾下壯士突圍出士卒死傷者衆上悔輕發釋其罪明年遷工部侍郎爲北院樞密副使開泰五年卒

耶律的琮字耶窻仲父房之後習兵事爲左皮室詳穩統和二十八年伐高麗的琮率本部軍與盆奴等擒康肇李玄蘊于銅州帝壯之曰以卿英才爲國戮力眞吾家千里駒也乃賜御馬及細鎧明年爲北院大王出爲烏古敵烈部都詳穩年七十二卒

大康父渤海人開泰間累官南府宰相出知黃龍府善綏撫東部懷服榆里底乃部長伯陰與榆烈比來附送于朝且言蒲盧毛朶界多渤海人乞取之詔從其請康父領兵至大石河馳準城掠數百戶以歸未

幾卒

論曰高句驪弑其君誦而立詢遼興問罪之帥宜其簞食壺漿以迎除舍以待而廻乘險放拒俾智者竭其謀勇者窮其力雖得其要領而顛顛獨居一海之中自若也豈服人者以德而不以力歟況乎殘毀其宮室係累其民人所謂以燕伐燕也歟嗚呼朱崖之棄捐之之力也敵烈之諫有焉

遼史卷八十八考證

耶律資忠傳高麗內屬取女直六部地詔資忠往問故四年再使高麗留弗遣九年高麗上表謝罪始送資忠還○引長發按聖宗本紀資忠使高麗者再一是開泰二年六月還于八月一是開泰三年二月

還于九年五月本傳訛三年爲四年

遼史卷八十八考證

遼史卷八十九

元中書右丞相總裁脫脫等修

列傳第十九

耶律庶成庶籤 潘魯楊哲 耶律韓留 楊信 耶律和尙

耶律庶成字喜隱小字陳六季父房之後父吳九檢校太師庶成幼好學書過目不忘善遼漢文字於詩尤工重熙初補牌印郎君累遷樞密直學士與蕭韓家奴各進四時逸樂賦帝嗟賞初契丹醫人鮮知切脉審藥上命庶成譯方脉書行之自是人皆通習雖諸部族亦知醫事時入禁中叅決疑議偕林牙蕭韓家奴等撰實錄及禮書與樞密副使耶律德修定法令上詔庶成曰方今法令輕重不倫法令者為政所先人命所繫不可不慎卿其審度輕重從宜修定庶成參酌古今刊正訛謬成書以進帝覽而善之庶成方進用為妻胡篤所誣以罪奪官絀為庶耶律使吐蕃凡十二年清寧間始歸帝知其誣詔復本族仍遷所奪官卒庶成嘗謂林牙夢善卜者胡呂古卜曰官止林牙因妻得罪及置於理法當離婚胡篤適有娠至期不產而死剖視之其子以手抱心識者謂誣夫之報有詩文行于世弟庶籤

庶籤字陳甫善屬文重熙中為本族將軍咸雍元年同知東京留守事俄徙烏衍突厥部節度使九年知

簡州事明年遷都林牙上表乞廣本國姓氏曰我朝創業以來法制修明惟姓氏止分爲二耶律與蕭而已始太祖制契丹大字取諸部鄉里之名續作一篇著于卷末臣請推廣之使諸部各立姓氏庶男女婚媾有合典禮帝以舊制不可遽釐不聽太康二年出耶律乙辛爲中京留守庶箴與耶律孟簡表賀頃之乙辛復爲樞密使專權恣虐庶箴私見乙辛泣曰前抗表非庶箴之願也乙辛信其言乃得自安聞者鄙之八年致仕卒子蒲魯

蒲魯字乃展幼聰悟好學甫七歲能誦契丹大字習漢文未十年博通經籍重熙中舉進士第主文以國制無契丹試進士之條聞于上以庶箴擅令子就科目鞭之二百尋命蒲魯爲牌印郎君應詔賦詩立成以進帝嘉賞顧左右曰文才如此必不能武事蒲魯奏曰臣自蒙義方兼習騎射在流輩中亦可周旋帝未之信會從獵三矢中三兔帝奇之轉通進是時父庶箴嘗寄戒諭詩蒲魯答以賦衆稱其典雅寵遇漸隆清寧初卒

楊哲字昌時安次人幼通五經大義聖宗聞其穎悟詔試詩授秘書省校書郎太平十一年擢進士乙科爲著作佐郎重熙十二年累遷樞密都承旨權度支使登對稱旨進樞密副使歷長寧軍節度使山西路轉運使知興中府清寧初入知南院樞密使與姚景行同總朝政請行柴冊禮封趙國公以足疾復知興

中府咸雍初徙封齊召賜同德功臣尙書左僕射兼中書令拜樞密使改封晉給宰相樞密使兩廳僚從封趙王屢請歸政益賜保節功臣致仕太康五年例改遼西郡王薨

耶律韓留字速靈仲父隋國王之後有明識篤行義舉止嚴重工爲詩統和間召攝御院通進開泰三年稍遷烏古敵烈部都監俄知詳穩事敵烈部叛將宮分軍從樞密使耶律世良討平之加千牛衛大將軍重熙元年累遷至同知上京留守改奚六部禿里太尉性不苟合爲樞密使蕭解里所忌上欲召用韓留解里言目病不能視議遂寢四年召爲北面林牙帝曰朕早欲用卿聞有疾故待之至今韓留對曰臣昔有目疾才數月耳然亦不至于昏第臣駑拙不能事權貴是以不獲早覩天顏非陛下聖察則愚臣豈有今日耶詔進述懷詩上嘉歎方將大用卒

楊佶字正叔南京人幼穎悟異常讀書自能成句識者奇之弱冠聲名籍甚統和二十四年舉進士第一歷校書郎大理正開泰六年轉儀曹郎典掌書命加諫議大夫出知易州治尙清簡徵發期會必信入爲大理少卿累遷翰林學士文章號得體八年燕地饑疫民多流殍以佶同知南京留守事發倉廩振乏絕貧民鬻子者計傭而出之宋遣梅詢賀千齡節詔佶迎送多唱酬詢每見稱賞復爲翰林學士重熙元年陞翰林學士承旨丁母憂起復工部尙書歷中順軍節度使朔武等州觀察處置使天德軍節度使加特

進檢校太師同中書門下平章事復拜參知政事兼知南院樞密使十五年出爲武定軍節度使境內亢旱苗稼將槁視事之夕雨澤霑足百姓歌曰何以蘇我上天降雨誰其撫我楊公爲主灤陽水失故道歲爲民害乃以己俸創長橋人不病涉及被召郡民攀轅泣送上御清涼殿宴勞之卽日除吏部尙書兼門下侍郎同中書門下平章事上曰卿今日何減呂望之遇文王佶對曰呂望比臣遭際有十年之晚上悅其居相位以進賢爲己任事總大綱責成百司人人樂爲之用三請致政許之月給錢粟僦隸四時遣使存問卒有登瀛集行于世

耶律和尚字特抹系出季父房善滑稽重熙初補祿候郎君時帝篤于親親凡三父之後皆序父兄行第於和尚尤狎愛然每侍宴飲雖詼諧未嘗有一言之過由是上益重之歷積慶永興宮使累遷至同知南院宣徽使事南面林牙十六年出爲懷化軍節度使俄召爲御史大夫二十三年因大冊加天平軍節度使檢校太師徙中京路案問使卒和尚雅有美行數以財恤親友人皆愛重然嗜酒不事事以故不獲柄用或以爲言答曰吾非不知顧人生如風燈石火不飲將何爲晚年沈湎尤甚人稱爲酒仙云

論曰庶成法令治民者不容高下其手庶箴雖嘗表請廣姓氏以秩典禮其隨勢俯仰則有愧於其子蒲魯矣楊哲爲上寵遇迭封王爵而功業不少槩見然得愛民治國之要其楊佶哉

乾隆四年校刊

遼史卷八十九
列傳

三

遼史卷八十九

遼史卷九十

元 中 書 右 丞 相 總 裁 脫 脫 等 修

列傳第二十

蕭阿剌 耶律義先 信先 蕭陶隄 蕭塔刺葛 耶律敵祿

蕭阿剌字阿里懶北院樞密使孝穆之子也幼養宮中興宗尤愛之重熙六年爲弘義宮使累遷同知北院樞密使加同中書門下平章事出爲東宮留守二十一年拜西北路招討使封西北郡王尋尙秦晉國王公主拜駙馬都尉清寧元年遺詔拜北府宰相兼南院樞密使進王韓明年改北院樞密使徙王陳與蕭革同掌國政革諂諛不法阿剌爭之不得告歸上由此惡之除東京留守會行瑟瑟禮入朝陳時政得失革以事中傷帝怒縊殺之皇太后營救不及大慟曰阿剌何罪而遽見殺帝乃優加贈葬乾陵之赤山阿剌性忠果曉世務有經濟才議者以謂阿剌若在無重元乙辛之亂

耶律義先于越仁先之弟也美風姿舉止嚴重重熙初補祇候郎君班詳穩十三年車駕西征爲十二行亂都監戰功最改南院宣徽使時蕭革同知樞密院事席寵擅權義先疾之因侍謫言于帝曰革狡佞曷亂一朝大用必誤國家言甚激切不納它日侍宴上命羣臣博負者罰一巨觥義先當與革對憮然曰臣

縱不能進賢退不肖安能與國賊博哉帝止之曰卿醉矣義先厲聲詰不已上大怒賴皇后救得解翌日
上謂革曰義先無禮當黜之革對曰義先天性忠直今以酒失而出誰敢言人之過上謂革忠直益加信
任義先鬱鬱不自得然議事未嘗少沮又於上前博義先祝曰向言人過冒犯天威今日一擲可表愚款
俄得堂印上愕然十六年爲殿前都點檢討蒲奴里多所招降獲其酋長陶得里以歸手詔褒獎以功改
南京統軍使封武昌郡王奏請統軍司錢營息以贍貧民未葺軍器完整民得休息二十一年拜惕隱進
王宮春薨年四十二義先常戒其族人曰國中三父房皆帝之昆弟不孝不義尤不可爲其接下無貴賤
賢否皆與均禮其妻晉國長公主之女每遇中表親非禮服不見故內外多化之清寧間追贈許王弟信
先

信先興宗以其父瑰引爲刺血友幼養于宮善騎射重熙十四年爲左護衛太保同知殿前點檢司事十
八年兼右祇候郎君班詳穩上問所欲信先曰先臣瑰引與陛下分如同氣然不及王封儻使蒙恩地下
臣願畢矣上曰此朕遺忘之過追封燕王是年從蕭惠伐夏敗於河南例被責清寧初爲南面林牙卒

蕭陶隗字烏古鄰宰相轄特六世孫剛直有威重咸雍初任馬羣太保素知羣牧名存實亡悉闕舊籍除
其羸病錄其實數牧人畏服陶隗上書曰羣牧以少爲多以無爲有上下相蒙積弊成風不若括見真數

著爲定籍公私兩濟從之畜產歲以蕃息太康中累遷契丹行宮都部署上嘗謂羣臣曰北樞密院軍國重任久闕其人耶律阿思蕭幹特刺二人孰愈羣臣各譽所長陶隗獨默然上問卿何不言陶隗曰訛特刺懦而敗事阿思有才而貪將爲禍基不得已而用敗事猶勝基禍上曰陶隗雖魏徵不能過但恨吾不及太宗爾然竟以阿思爲樞密使由是阿思銜之九年西園不寧阿思奏曰邊隅事大可擇重臣鎮撫上曰陶隗何如阿思曰誠如聖旨遂拜西南面招討使阿思陰與蕭阿忽帶誣奏賊掠漠南牧馬及居民畜產陶隗不急追捕罪當死詔免官久之起爲場母城節度使未行疽發背卒陶隗負氣怒則須髯輒張每有大議必毅然決之雖上有難色未嘗遽已見權貴無少屈竟爲阿思所陷時人情之二子曰圖木轄式阿思死始獲進用

蕭塔刺葛字陶晒六院部人素剛直太祖時坐叔祖臺晒謀殺于越釋魯沒入弘義宮世宗卽位以舅氏故出其藉補國舅別部敝史或言泰寧王察割有無君心塔刺葛曰彼縱忍行不義人孰肯從他日侍宴酒酣塔刺葛捉察割耳強飲之曰上固知汝傲狠然以國屬曲加矜憫使汝在左右且度汝才能爲若長惡不悛徒自取赤族之禍察割不能答強笑曰何戲之虐也天祿末塔刺葛爲北府宰相及察割作亂塔刺葛醉言曰吾悔不殺此逆賊尋爲察割所害

耶律敵祿字陽隱孟父楚國王之後性質直多膂力察割作亂敵祿聞之入見壽安王慷慨言曰願得精兵數百破賊黨王嘉其忠穆宗卽位爲北院宣徽使上以飛狐道狹詔敵祿廣之明年將兵援河東至太原與漢王會于高平擊周軍敗之仍降其衆忻代二州叛將兵討之會耶律撻烈至敗周師於忻口師還卒

論曰忠臣惟知有國而不知有身故惡惡不避其患阿刺以諂諛不法折蕭革陶隴以用必基禍言阿思塔刺葛以忍行不義徒自取赤族之罪責察割其心可謂忠矣言一出而禍輒隨之吁邪正旣不辨國焉得無亂哉

遼史卷九十一

元 中 書 右 丞 相 總 裁 脫 脫 等 修

列傳第二十一

耶律韓八

耶律唐古

蕭朮哲

藥師奴

耶律玦

耶律僕里篤

耶律韓八字嘲隱個儻有大志北院詳穩古之五世孫太平中游京師寓行宮側惟囊衣匹馬而已帝微服出獵見而問之曰汝為何人韓八初不識漫應曰我北院部人韓八來覓官耳帝與語知有長才陰識之會北院奏南京疑獄久不決帝召韓八馳驛審錄舉朝皆驚韓八量情處理人無冤者上嘉之籍羣物馬闕其二同事者考尋不已韓八略不加詰即先馳奏帝益信任景福元年為左夷離畢徙北面林牙眷遇優異重熙六年改北院大王政務寬仁復為左夷離畢十二年再為北院大王入朝帝從容謂曰卿守邊任重當實府庫振貧乏以報朕既受詔愈竭忠謹知無不言便益為多卒年五十五上聞悼惜死之日篋無舊著施無新衣遣使弔祭給葬具韓八平居不屑細務喜愠不形嘗失所乘馬家僮以同色者代之數月不覺

耶律唐古字敵隱于越屋質之庶子廉謹善屬文統和二十四年述屋質安民治盜之法以進補小將軍

遷西南面巡檢歷豪州刺史唐古部詳穩嚴立科條禁姦民鬻馬於宋夏界因陳弭私販安邊境之要太后嘉之詔邊境遵行著爲令朝議欲廣西南封域黑山之西綿亘數千里唐古言戍壘太遠卒有警急赴援不及非良策也從之西蕃來侵詔議守禦計命唐古勸督耕稼以給西軍田于臚胸河側是歲大熟明年移屯鎮州凡十四稔積粟數十萬斛斗米數錢重熙間改隗衍党項部節度使先是築可敦城以鎮西域諸部縱民畜牧反招寇掠重熙四年上疏曰自建可敦城已來西蕃數爲邊患每煩遠戍歲月旣久國力耗竭不若復守故疆省罷戍役不報是年致仕乞勒其父屋質功于石帝命卽律庶成製文勒石上京崇孝寺卒年七十八

蕭朮哲字石魯隱孝穆弟高九之子以戚屬加監門衛上將軍重熙十三年將衛兵討李元昊有功遷興聖宮使蒲奴里部長陶得里叛朮哲爲統軍都監從都統耶律義先擊之擒陶得里朮哲與義先不協義先罪免官稍遷西南面招討都監坐事下獄以太后言杖而釋之清寧初爲國舅詳穩西北路招討使私取官粟三百斛及代留畜產令主者鬻之以償後族弟胡覲到部發其事帝怒決以大杖免官尋起爲昭德軍節度使徵爲北院宣徽使九年上以朮哲先爲招討威行諸部復爲西北路招討使訓士卒增器械省追呼嚴號令人不敢犯邊境晏然十年入朝封柳城郡王咸雍二年拜北府宰相爲北院樞密使耶

律乙辛所忌誣尤哲與護衛蕭忽古等謀害乙辛詔獄無狀罷相出鎮順義軍卒追王晉宋梁三國姪藥師奴

藥師奴幼穎悟謹禮法補祇候郎君太康中爲興聖宮使累遷同知殿前點檢司事上嘉其宿衛嚴肅遷右夷裔畢夏王李乾順爲宋所攻求解帝命藥師奴持節使宋請罷兵通好宋從之拜南面林牙改漢人行宮副部署乾統初出爲安宋軍節度使卒

耶律玦字吾展遙輦鮮質可汗之後重熙初召修國史補符寶郎累遷知北院副部署事入見太后后顧左右曰先皇謂玦必爲偉人果然除樞密副使出爲西南面招討都監歷同簽南京留守事南面林牙皇弟秦國王爲遼興軍節度使以玦同知使事多所匡正十年復爲樞密副使咸雍初兼北院副部署及秦國王爲西京留守請玦爲佐從之歲中獄空者三召爲孟父房敞繙玦不喜貨殖帝知其貧賜宮戶十嘗謂宰相曰契丹忠正無如玦者漢人則劉伸而已然熟察之玦優於伸先是西北諸部久不能平上遣玦問狀執弛慢者痛繩之以酒疾卒

耶律僕里篤字燕隱六院林牙突呂不也四世孫開泰間爲本班郎君有捕盜功樞密使蕭朴薦之遷率府率太平中同知南院宣徽事累遷彰聖軍節度使十六年知興中府以獄空聞十八年伐夏攝西南面

招討使十九年夏人侵金肅軍敗之斬首萬餘級加右武衛上將軍時近邊羣牧數被寇掠遷倒塌嶺都監以治之桴鼓不鳴二十年知金肅軍事宰相趙惟節總領邊城橋道芻粟請貳帝命僕里篤副之以稱職聞清寧初歷長寧匡義二軍節度使致仕咸雍間卒子阿固質終倒塌嶺都監

論曰韓八因帝微行才始見售及任以事落落知大體不負上之知矣唐古朮哲經略西北邊勸農積粟訓練士卒敵人不敢犯玦以忠直見稱於上僕里篤以幹敏爲宰相佐在鎮俱以獄空聞之數人者豈特甲冑之士亦李牧程不識之亞歟

遼史卷九十二

元中書右丞相總裁脫脫等修

列傳二十二

蕭奪剌

蕭普達

耶律侯哂

耶律古昱

耶律獨擲

蕭韓家

蕭烏野

蕭奪剌字按懶遙鞏注可汗宮人祖涅魯古北院樞密副使父撒抹字胡獨董重熙初補祇候郎君累遷北面林牙十九年從耶律宜新蕭蒲奴伐夏至蕭惠敗績之地獲偵候者知人烟聚落多國人陷沒而不能還者盡俘以歸拜大父斂穩知山北道邊境事清寧初歷西南面西北路招討使加同中書門下平章事卒奪剌體貌豐偉騎射絕人由祇候郎君陞漢人行宮副部署後爲烏古敵烈統軍使克敵有功加龍虎衛上將軍授西北路招討使因陳北邊利害請以本路諸部與倒塌嶺統軍司連兵屯戍再表不納改東北路統軍使乾統元年以久練邊事復爲西北路招討使北阻卜耶靉刮率鄰部來侵奪剌逆擊追奔數十里二年乘耶靉刮無備以輕騎襲之獲馬萬五千足牛羊稱是先是有詔方面無事招討副統軍都監內一員入覲是時同僚皆闕奪剌以軍事付幕吏而朝坐是免官改西京留守復爲東北路統軍卒于

官

蕭普達字彈隱統和初爲南院承旨開泰六年出爲烏古部節度使七年敵烈部叛討平之徙烏古敵烈部都監遣敵烈騎卒取北阻卜名馬以獻賜詔褒獎重熙初改烏古敵烈部都詳穩討諸蕃有功普達深練邊事能以悅使人有所俘獲悉散麾下由是大得衆心歷西南面招討使党項叛入西夏普達討之中流矢歿于陣帝聞惜之贈贈加厚

耶律侯晒字禿靈北院夷离堇蒲古只之後祖查只北院大王父忽古黃皮室詳穩侯晒初爲西南巡邊官以廉潔稱累遷南京統軍使尋爲北院十王重熙十一年党項部人多叛入西夏侯晒受詔巡西邊沿河要地多建城堡以鎮之徙東京留守十三年與知府蕭歐里斯討蒲盧毛朶部有功加兼侍中致仕卒耶律古昱字磨魯堇北院林牙突呂不四世孫有膂力工馳射開泰間爲烏古敵烈部都監會部人叛從樞密使耶律世良討平之以功詔鎮撫西北部教以種樹畜牧不數年民多富實中京盜起命古昱爲巡邏使悉擒之上親征渤海將黃皮室軍有破敵功累遷御史中丞尋授開遠軍節度使徙鎮歸德二十一年改天成軍節度使卒于官年七十贈同中書門下平章事二子宜新兀沒宜新重熙間從蕭惠討西夏惠敗績宜新一軍獨全拜北院大王兀沒太康三年爲漢人行宮副部署乙辛誣害太子詞連兀沒帝釋

之是秋乙辛復奏與之爾楊九私讓宮蓋事被害乾統間贈同中書門下平章事

耶律獨攬字胡獨臺太師古昱之子重熙初爲左護衛將禁兵從伐夏有功授十二行紉司徒再舉伐夏獨攬括山西諸郡馬還遷拽刺詳穩西南未平命獨攬同知金肅軍事夏人來侵擊敗之進涅刺與隗部節度使清寧元年召爲皇太后左護衛太保四年改寧遠軍節度使東路饑奏振之歷五國烏古部遼興軍三鎮節度使四捷軍詳穩太康元年卒追贈同中書門下平章事子阿思有傳

蕭韓家國舅之族姓端簡謹愿動循禮法清寧中爲護衛太保太康二年遷知北院樞密副使三年經靈西南邊天池蓄擊立堡砦正疆界刻石而還爲漢人行宮都部署是年秋獵墮馬卒

蕭烏野字草隱其先出興聖宮分觀察使塔里直之孫也性孝悌尚禮法雅爲鄉黨所稱重熙中補護衛興宗見其勤恪遷護衛太保佐耶律仁先平重元亂以功加團練使時敵烈部數爲鄰部侵擾民多困弊命烏野爲敵烈部節度使恤困窮督徭役不數月部人以安尋以母老歸養于家母亡尤極哀毀服闋歷官興聖延慶二宮使卒

論曰烏育敵烈大部也奪刺爲統軍克敵有功普達居詳穩悅以使人西北重鎮也侯晒巡邊以廉稱古昱鎮撫而民富獨攬駐金肅而夏人不敢東獵噫部人內附方面以寧雖朝廷處置得宜而諸將之力抑

亦何可少哉

遼史卷九十二

遼史卷九十三

元 中 書 右 丞 相 總 裁 脫 脫 等 修

列傳第二十三

蕭惠

慈氏奴

蕭廷魯

鐸盧幹

蕭圖玉

耶律鐸軫

蕭惠字伯仁小字脫古思濳欽皇后弟阿古只五世孫初以中宮親爲國舅詳穩從伯父排押征高麗至奴古達北嶺高麗阻險以拒惠力戰破之及攻開京以軍律整肅聞投契丹行宮都部署開泰二年改南京統軍使未幾爲右夷離畢加同中書門下平章事朝議以遼東重地非勳戚不能鎮撫乃命惠知東京留守事改西北路招討使封魏國公太平六年討回鶻阿薩蘭部徵兵諸路獨阻卜酋長直刺後期立斬以狗進至甘州攻圍三日不克而還時直刺之子聚兵來襲阻卜酋長烏八密以告惠未之信會西阻卜叛襲三克軍都監涅魯古突舉部節度使諧里阿不呂等將兵三千來救遇敵于可敦城西南諧理阿不呂戰歿士卒潰散惠倉卒列陣敵出不意攻我營衆請乘時奮擊惠以我軍疲敝未可用弗聽烏八請以夜斫營惠又不許阻卜歸惠乃設伏兵擊之前鋒始交敵敗走惠爲招討累年屢遭侵掠士馬疲困七年左遷南京侍衛親軍馬步軍都指揮使尋遷南京統軍使興宗卽位知興中府歷順義軍節度使東京留

守西南面招討使加開府儀同三司檢校太師兼侍中封鄭王賜推誠協謀竭節功臣重熙六年復爲契丹行宮都部署加守太師徙王趙拜南院樞密使更王齊是時帝欲一天下謀取三關集羣臣議惠曰兩國疆弱聖慮所悉宋人西征有年師老民疲陛下親率六軍臨之其勝必矣蕭孝穆曰我先朝與宋和好罪無伐之其曲在我況勝敗未可逆料願陛下熟察帝從惠言迺遣使索宋十城會諸軍于燕惠與太弟帥師壓宋境宋人重失十城增歲幣請和惠以首事功進王韓十二年兼北府宰相同知元帥府事又爲北樞密使十三年夏國李元昊誘山南党項諸部帝親征元昊懼請降惠曰元昊忘奕世恩萌姦計車駕親臨不盡歸所掠天誘其衷使彼來迎天與不圖後悔何及帝從之請且進軍夏人列拒馬于河西蔽盾以立惠擊敗之元昊走惠麾先鋒及右翼邀之夏人千餘潰圍出我師逆擊大風忽起飛沙眯目軍亂夏人乘之蹂踐而死者不可勝計詔班師十七年尙弟姊秦晉國長公主拜駙馬都尉明年帝復征夏國惠自河南進戰艦糧船綿亘又百里旣入敵境偵候不還鎧甲載于車軍士不得乘馬諸將咸請備不虞惠曰諒詐必自迎車駕何暇及我無故設備徒自弊耳數日我軍未營候者報夏師至惠方詰妄言罪諒詐軍從阪而下惠與麾下不及甲而走追者射惠幾不免軍士死傷尤衆師還以惠子慈氏奴歿于陣詔釋其罪十九年請老詔賜肩輿入朝策杖上殿辭章再上乃許之封魏國王詔冬夏赴行在參決疑議既歸

遣賜湯藥及他賜資不絕每生日輒賜詩以示尊寵清寧二年薨年七十四遺命家人薄葬訃聞輟朝三日惠性寬厚自奉儉薄興宗使惠恣取珍物惠曰臣以戚屬據要地祿足養廉奴婢千餘不爲闕乏陛下猶有所賜貧於臣者何以待之帝以爲然故爲將雖數敗衄不之罪也弟虛列武定軍節度使二子慈氏奴兀古匿兀古匿終北府宰相慈氏奴字靈隱太平初以戚屬補祇候郎君上愛其勤慎陞開撒拔加右監門衛上將軍西邊有警授西北路招討都監領保大軍節度使政濟恩威諸部悅附入爲殿前副點檢歷烏古敵烈部詳穩征李諒祚爲統軍都監與西北路招討使敵魯古率蕃部諸軍由北路趨涼州稷諒祚親屬夏人扼險以拒慈氏奴中流矢卒年五十一贈中書門下平章事

蕭汪魯字胡突董五院部人父約質歷官節度使汪魯重熙間爲牌印郎君清寧九年國家旣平重元之亂其黨郭九等亡詔汪魯追捕獲之遷護衛太保咸雍元年使宋議邊事稱旨知殿前副點檢事五年阻卜叛爲行軍都監擊敗之俘獲甚衆初軍出止給五月糧過期糧乏士卒往往叛歸汪魯坐失計免官降戍西北部未行會北部兵起汪魯將烏古敵烈兵擊敗之每戰以身先鋒是釋前罪命總知烏古敵烈部九年敵烈叛都監耶律獨迭以兵少不戰屯臚胸河敵烈合邊人掠居民汪魯率精騎四百力戰敗之盡獲其輜重繼聞酋長合朮三千餘騎掠附近部落縱兵躡其後連戰二日斬數千級盡得被掠人畜而還

值敵烈黨五百餘騎劫捕鷹戶逆擊走之俘斬甚衆自是敵烈勢沮時敵烈方爲邊患而阻卜相繼寇掠邊人以故疲弊朝廷以地遠不能時益援軍而使疆圉帖然者皆迂魯力也帝加其功拜左皮室詳穩會宋求天池之地詔迂魯兼統兩皮室軍屯太牢古山以備之太康初阻卜叛遷西北招討都監從都統耶律趙三征討有功改南京統軍都監黃皮室詳穩未幾遷東北路統軍都監卒弟鐸盧幹

鐸盧幹字撒板幼驚悟異常兒三歲失母哭盡哀見者傷之及長魁偉沉毅好學善屬文有才幹年三十始仕爲朝野推重給事北院知聖旨事太康二年乙辛再入樞府鐸盧幹素與蕭巖壽善誣以罪謫戍西北部坐皇太子事特恩減死仍錮終身在戍十餘年太子事稍直始得歸鄉里屏居謝人事一日臨流聞雉鳴三復孔子時哉語作古詩三章見志當時名士稱其高情雅韻不減古人壽隆六年卒年六十一乾統初贈彰義軍節度使

蕭圖玉字兀衍北府宰相海瓌之子統和初皇太后稱制以戚屬入侍尋爲烏古部都監討速母縷等部有功遷烏古部節度使十九年總領西北路軍事後以本路兵伐甘州降其酋長牙懶旣而牙懶復叛命討之克肅州盡遷其民于土隄口故城師還詔尙金鄉公主拜駙馬都尉加同政事令門下平章事上言曰阻卜今已服化宜各分部治以節度使上從之自後節度使往往非材部民怨而思叛開泰元年七月

石烈太師阿里底殺其節度使西奔窩魯朶城蓋古所謂龍庭單于城也已而阻卜復叛圍圖玉于可敦城勢甚張圖玉使諸軍齊射却之屯于窩魯朶城明年北院樞密使耶律化哥引兵來救圖玉遣人誘諸部皆降帝以圖玉始雖失計後得人心釋之仍領諸部請益軍詔讓之曰叛者既服兵安用益且前日之役死傷甚衆若從汝謀邊事何時而息遂止會公主坐殺家婢降封郡主圖玉罷使相尋起爲烏古敵烈部詳穩以老代還卒子雙古南京統軍使孫訛篤幹尙三韓郡王合魯之女骨浴公主終烏古敵烈部統軍使以善戰名于世

耶律鐸軫字敵鞏積慶宮人仕統和間性疎簡不顧小節人初以是短之後侵宋分總羸師以從及戰取緋帛被介冑以自標顯馳突出入敵陣格殺甚衆太后望見喜召謂之曰卿戮力如此何患不澤厚賞之由是多以軍事屬任俄授京北詳穩開泰二年進討阻卜克之重熙間歷東路統軍使天德軍節度使十七年城西邊命鐸軫相地及造戰艦因成樓船百三十艘上置兵下立馬規制堅壯稱旨及西征詔鐸軫率兵由別道進會于河濱敵兵阻河而陣帝御戰艦絕河擊之大捷而歸親賜卮酒仍問所欲鐸軫對曰臣幸被聖恩得効駑力萬死不能報國又將何求帝愈重之手書鐸軫衣裾曰勤國忠君舉世無雙卒于官年七十子低烈歷觀察節度使

論曰劫遼之謀復三關也蕭惠贊伐宋之舉而宋人增幣請和狃於一勝移師西夏而勇智俱廢敗潰隨之豈非貪小利迷遠圖而然況所得不償所亡利杲安在哉同時諸將撫綏邊圉若迂魯忠勤不伐鐸軫高情雅韻鐸盧幹雖廉不逮蕭惠而無邀功啟釁之罪亦庶乎君子之風矣

遼史卷九十四

元 中 書 右 丞 相 總 裁 脫 脫 等 修

列傳第二十四

耶律化哥

耶律斡臘

耶律速撒

蕭阿魯帶

耶律那也

耶律何魯掃古

耶律世良

耶律化哥字弘隱孟父楚國王之後善騎射乾亨初爲北院林牙統和四年南侵宋化哥擒謀者知敵由海路來襲卽先據平州要地事平拜上京留守遷北院大王十六年復侵宋爲先鋒破敵于遂城以功遷南院大王尋改北院樞密使開泰元年伐阻十阻十棄輜重遁走俘獲甚多帝嘉之封幽王後邊吏奏自化哥遺闕糧乏馬弱勢不可守上復遣化哥經略西境化哥與邊將深入聞蕃部逆命居翼只水化哥徐以兵進敵望風奔潰獲羊馬及輜重路由白拔烈遇阿薩蘭回鶻掠之都監裏里繼至謂化哥曰君誤矣此部實効順者化哥悉還所俘諸蕃由此不附上使案之削王爵以待中遙領大同軍節度使卒

耶律斡臘字斯靈奚迭刺部人趨捷有力善騎射保寧初補護衛車駕獵嶺山適豪猪伏叢莽帝射中猪突出御者托滿捨轡而避廐人鶴骨翼之斡臘復射而斃帝嘉賞及獵赤山適奔鹿香角突前路隘不容

避垂犯蹕斡臘以身當之鹿觸而顛帝謂曰朕因獵兩瀕于危賴卿以免始見爾心遷護衛太保從樞密使耶律斜軫破宋將楊繼業軍于山西統和十三年秋爲行軍都監從都部署奚王和朔奴伐兀惹烏昭度數月至其城昭度請降和朔奴利其俘掠令四面急攻昭度率衆死守隨方捍禦依埤堦虛構戰棚誘我軍登陴俄撤枝柱登者盡覆和朔奴知不能下欲退蕭恆德謂師久無功何以藉口若深入大涼猶勝空返斡臘曰深入恐所得不償所損恆德不從略地東南循高麗北鄙還道遠糧絕人馬多死詔奪諸將官惟斡臘以前議得免尋加同政事門下平章事爲東京留守開泰中卒

耶律速撒字阿敏性忠直簡毅練武事應祿初爲侍從累遷突呂不部節度使歷霸濟祥順聖五州都總管俄爲敦睦宮大師保寧三年改九部都詳穩四年伐党項屢立戰功手詔勞之統和初皇太后稱制西邊甫定速撒務安集諸蕃利害輒具以聞太后益信任之凡臨戎與士卒同甘苦所獲均賜將校賞順討逆威信大振在邊二十年卒

蕭阿魯帶字乙辛隱烏隗部人父女古仕至紕詳隱阿魯帶少習騎射曉兵法清寧間始仕累遷本部司徒改烏古敵烈統軍都監大安七年遷山北副部署九年達理得拔思母二部來侵率兵擊却之達理得復劫牛羊去阿魯帶引兵追及盡獲所掠斬渠帥數人是冬達理得等以三百餘人梗邊復戰却之斬首

二百餘級加金吾衛上將軍封蘭陵餘公壽隆元年第功加同中書門下平章事進爵郡公改西北路招討使乾隆三年坐留宋俘當遣還者爲奴免官後被徵以老疾致仕卒

耶律那也字移斯肇夷离董蒲古只之後父幹常爲北剋從伐夏戰歿季父趙三始爲宿直官累遷至北面林牙咸雍四年拜北院大王改西南面招討使太康中西北諸部擾邊議欲往討帝以爲非趙三不可遂拜西北路招討使兼行軍都統平之以功復爲北院大王那也敦厚才敏上以其父幹死王事九歲加諸衛小將軍爲題里司徒尋召爲宿直官太康三年爲遙輦尅大安九年爲倒塌嶺節度使明年冬以北阻卜長磨古斯叛與招討都監耶律胡呂率精騎二千往討破之那也薦胡呂爲漢人行宮副部署壽隆元年復討達理拔思等有功賜詔褒美改烏古敵烈部統軍使邊境以寧部民乞留詔許再任乾統六年拜中京留守改北院大王薨那也爲人廉介長于理民每有關訟親覈曲直不尙威嚴常曰凡治人本欲分別是非何事迫脅以立名故所至以惠化稱

耶律何魯掃古字烏古鄰孟父房之後重熙末補祇候郎君清寧初加安州團練使太康中歷懷德軍節度使奚六部秃里太尉詔與樞密官措畫東北邊事改左護衛太保侍上言多率易察無他賜以故上優貸之八年知西北路招討使事時邊部耶都刮等來侵何魯掃古誘北阻卜酋豪磨古斯攻之俘獲甚衆

以功加左僕射復討耶覲刮等誤擊磨古斯北阻卜由是叛命遣都監張九討之不克二室韋與大院部特滿擊牧宮分等軍俱陷于敵何魯掃古不以實聞坐是削官決以大杖壽隆間累遷惕隱兼侍中賜保節功臣道宗崩與宰相耶律儼總山陵事乾統中致仕卒

耶律世良小字幹六院部人才敏給練達國朝典故及世譜上書與族弟敵烈爭嫡庶帝始識之時北院樞密使韓德讓病帝問孰可代卿德讓曰世良可北院大王耶律室魯復問北院之選德讓曰無出世良統和末爲北院大王開泰初因大冊禮加檢校太尉同政事門下平章事時邊部拒命詔北院樞密使耶律化哥將兵以世良爲都監往禦之明年化哥還將罷兵世良上書曰化哥以爲無事而還不思師老糧乏敵人已去焉能久守若益兵可克也帝卽命化哥益兵與世良追之至安真河大破而還自是邊境以寧以功王岐拜北院樞密使三年命選馬馳于烏古部會敵烈部人夷刺殺其酋長稍瓦而叛鄰部皆應攻陷巨毋古城世良率兵壓境遣人招之降數部各復故地四年伐高麗爲副部署都統劉慎行還遼失期執還京師世良獨進兵明年至北都護府破追兵于郭州以暴疾卒

論曰大之懷小也以德制之也以威德不足懷威不足制而欲服人也難矣化哥利俘獲而諸蕃不附何魯掃古誤擊磨古斯而阻卜叛命是皆喜於一旦之功而不圖後日之患庸何議焉若幹臘之戒深入速

撤之務安集亦鐵中之錚錚者邪

乾隆四年校刊

遼史卷九十四
列傳

三

